

清容居士集

冊三



清容居士集卷第六

元 袁 桷 撰

古詩 七言

題高彥敬桑落洲望廬山圖

爲秋泉作

長江亭亭桑落洲一塔獨傲蘋花秋邊聲已逐鼙鼓盡水氣欲挾漁榔浮謫仙  
騎鯨五柳老真景變滅隨沙鷗空餘秦箏與羌管斷續不洗琵琶愁玉堂小窗  
解蒼佩宴坐得意毫端收空青點雲碧痕濕方諸取月寒光流匡廬老人在何  
許似覺領首相遲留佳峯棱棱鐵鉤鎖寸樹點點銅浮漚要知翰墨灑清氣俗  
子政爾勞雕鏤秋泉山人息機事青眼不與王公酬高張素壁凜太古擬跨獨  
鶴還磯頭人坐江湖在適意底用絕俗埋林丘披圖覽古重歎息天際杳靄疑  
歸舟

秋泉伯生仲章梅叔章周儀之皆次余韻題廬山圖再次韻以謝

海郡列戍連沙洲榆柳插戟搖清秋擬從京國洗氛瘴黃塵復作煙花浮西山

紫翠不可望但訝積雪如明鷗愛君寒齋之畫幅瀟灑不寫人間愁胸中丘壑  
我豈少奈此磊嵬難爲收宣城詩法挺二妙炯若玉瓚盛黃流永與天機愛神  
俊碧眼一顧羣無留千年周子古風月袞袞亦散空中漚乾坤無言混沌鑿頗  
怪我輩勞鑄鏤沈冥天台老仙伯清坐自與廬山酬天青無人月色古縹緲五  
老疑駢頭功名營身旋蟻磨芻豢得意崇糟丘何當相從老其下釀酒一醉黃  
金舟

張彥清以復古硯贈友人因賦長句

高皇南遊倦鋒鏑宴坐清都賓出日胸中筆陣掃玄雲時與端溪評甲乙平生  
紫玉無纖塵小窗寄傲茶甌春馬肝生寒出古色鵠眼獻秀憎妖顰烏號已去  
寧復得繭紙昭陵空悵憶猶餘舊賜落人間漆字模糊記朱色集賢學士胸次  
高愛此靜閱濡霜毫迺知貪夫罪懷壁底用長物爲神勞清齋持盃好顏色楚  
人之弓楚人得平生弟兄今始知一笑相看竟何惜蕭齋老人筆如錐松花蕩  
漾搖輕漪江南採菱曲已遠願寫紫府虛皇詞



金華曹道士白雲樓

蘇仙念母母苦飢化作白鶴時來飛我聞紫虛亦官府朝夕往返勞天機何如  
金華有真隱築室空翠搖煙霏松花麩蜜五鼎養丹砂汲井千年肥我生不識  
萱草歡孤身永日懷春暉白雲在天詎可望遲子歲晏山中歸

賦廣帥平寇還

蒼梧之山利如戟五溪南行水如墨文身鏤面號爲人蹙口磨牙時剽賊將軍  
手提丈二及匹馬直入深林居摩挲銅柱寫殊績南人自此長爲奴檳榔快嚼  
端禦瘴蕙苒不將真避謗繡袍初賜簇金鷄聚米爲圖指豪壯萬里功名非偶  
然輕身許國誰爲憐莫嫌儒冠守青簡能淬筆鋒書定遠

謝王參議送練春紅二枝

玉堂老仙玩幽獨閉戶無人似初溲倚闌岸幘領孤芳藪藪輕紅冠羣綠化工  
有意卑凡卉積李崇桃空眩目爭先鬪巧等堪憐已向東風盡驅逐此花清妍  
淨如洗收拾餘春傲榮辱何郎湯餅徒試粧太真溫泉空賜浴天然生色鑄真

態亭午低頭睡初足誰言花后最奇絕我怪酪奴能汙觸嫣然一笑奉清懽莫  
把金樽歌別鷓并刀妙翦駢頭來珠露淋漓袖新蹙似嫌凡子多京塵卻恨高  
人付流俗微風澹蕩新雨生強拭愁容吐殘馥擬將色筆寫清意綺語非工那  
忍瀆徘徊中庭月過半翠袖娟娟泣寒玉

題董簡卿瀟湘圖

瀟湘之水太古色煙樹空濛成寸碧奔騰日月轉銀丸噴薄峯巒凝鐵石楚棹  
相將客獨聞楚歌欵乃人誰識望盡蒼梧不見雲千古靈均空悵憶

絡馬圖

秋原苜蓿肥雲屯帖帖此馬和且馴屬車效駕豈在力愧汗絕足追奔塵良哀  
不生造父往公子毫端意悽愴虞淵逐日終飲河出門加鞭奈爾何

康樂圖

長安韓德卿夜夢至一宮室扁  
曰康樂因名其堂以奉其母

至人無夢夢乃真瞪目一視空中塵悲懽蟻旋水東注遺珠罔象迷其津持螯  
噉白逞談詭取禾坐極夸榮貴不如長安韓生道上眠念母還家枕中記紫霞

之宮那俗書煙霏霧結開雲圖虛靈變化在頃刻齧指疾應維心符城上烏啼  
畢逋尾倚門獨占乾鵲喜萬里辭親真可憐書來端有平安字

贈杜秀才歸省荆南

臨江種橘橘易朽滿籩積金金作奴何如遣兒束書帙婀娜初服游鴻都從師  
之樂端解語暫作庭前綵衣舞會待明年春水生雙槳如龍上天去

贈拙訥子

萬言不啻一杯水刻楮徒費三年功何如冥坐寂真靜木末時數南飛鴻長安  
之衢塵冪冪願言飲垢如飲蜜鸚鵡作賦真有才至今江浪猶銜哀

寄南劍李士弘使君

水雲離離千疊峯海日如鏡行天紅使君新沐坐清樾筆底丘壑生陰風玉蘭  
之花不受觸日給飛泉三百斛高春打衙人不來鶴立蒼苔動新綠

送任道士歸武夷

武夷之峯高插旻浴日離海朝爲賓石牀芙蓉迸膏露乳竇醺涼凝長春陰崖

怪壁鳥跡絕葛藟當戶苔鱗鱗神君枯魚古籩豆曾孫毛竹今霜筠千年金骨  
幻凡目玉匣九鑠光如新想當精思握宇宙魄質已化能成身我聞帝居亦官  
府風馬泱泱空中輪愛君釣鼈避東海笑踏北雪鬚眉銀寥寥空山太古水清  
夢入髓時相親誰言五色亂吾目得意忘象那非真歸來玄鶴忽不見勸汝速  
浣征衣塵

送郭天錫還京口

朔風吹塵著駝裘簌簌凝絮玄霜浮城南泥深擁車轍矮屋夜臥鄉心稠暮春  
雪消花始放積柳婀娜沙中洲布帆在手不易舉目數過翼隨雲流人言擔簦  
古奇遇邂逅一見能封侯紛紛寸舌有榮辱智士縮吻成身謀愛君亭亭日中  
鵠玉色已變扶桑游紫芝爲糧露爲醕北適瀚海觀羣漚素書滿囊不干世磊  
落肝膽看吳鉤新編翦雲彩鸞舞妙筆入木寒藤抽氣酣登臺望陳迹忼慨直  
欲微言酬舊家鐵甕古城下春浪汹涌今悠悠但當清談且飲酒往事寂歷遺  
磯頭黃鸝空桑子規怨橡實已盡榆根留長河滔天怒蛟走底用華表歸來愁

江湖清歡眇去袂風雨疾意催行舟人生會合定有樂念此別意空綢繆

燕吳閒閒冰雪相看

豪門炙熱熱如暑下馬還家汗流兩徒將嘖笑作清涼萬事回頭總塵土那知  
道人玩丘壑一榻高寒閒栩栩碧雲散作明窗塵妙墨還爲小山霧平生冷語  
出胸臆頗怪梅花猶媚嫵崢嶸歲晏凜今夕商榷斯文共樽俎要知冰雪本奇  
絕正色森寒傳太古我聞崑崙有至理陰火玉泉誰解煮會須鐵石起風雷手  
抉玄關破凝沍人間寒暑潮去來物外陰陽月吞吐閉門客散真兩忘竹影離  
離滿前戶

灑陽張節婦瓶中杏枝着花因賦

陶人妙合陰陽機凍壺頃刻回芳菲盈盈綠房綴冰蘂玉蜨婀娜穿帷飛佳人  
蓬鬢不下堂手繡孤鳳橫匡牀寶刀翦繒試春色翠袖慘澹顏無光烏頭可白  
珠九曲造物深知憐不足故應試此一枝春點綴扶疎驚衆目君不聞天上瓢  
髯龍平陸成波濤又不聞壁間壺兩曜瞬息如跳珠齊諧茫昧不可詰烟目看

朱勳成碧張氏之壺如截肪真火煉質千年剛枯根借潤表貞志慎勿語怪歸  
荒唐

仲章與余連舟而行仲章指畫皆不在人後夜泊夾馬營余舟適先至  
仲章有詩因以奉戲

我船如縮鱉瘳僕凌兢空挽曳掩篷熟睡初不知晚向沙頭踏新月君船如生  
駒追風破浪爭驩呼青春權郎紅蔽膝搖唇蹙口歌吳歛昨宵夾馬營前宿大  
似天公憐不足回帆望君君不鷹出沒高桅轉河曲人生作計那可旣誰能盡  
己不盡智積薪居上東方愁相位還須跛男子憶昨都門經歲除風吹乾雪塵  
模糊閉門擁被謝不出時人背笑何其疎只今船行一千里萬事乘除總如此  
愛君玉雪雲中英我歌作勞君且聽

蒲城孫世英編修父年九十四號嘉遜翁院長而次各賦詩

蒲城之下嘉遜翁銀髮髡耳雙碧瞳少年流離老康樂布領踏醉歌春風春風  
畏人屢歸去阿翁扶春春始住穿花入市爭捧盃採藥還家共攜路諸孫青襦



誦魯論寒燈夜授鄰壁聞泥深翻疑犢車險雪釋自訝駝裘溫憶昔種松如指  
長俯仰鐵榦參雲蒼桑田變滅理固有底用化鶴來還鄉只今翁年九十四萬  
事如雲日嬉戲迴首塵中輕薄兒奔走流年竟何事

嶽麓圖

積石落落雲中礮冠以蒼松藉瑤草天柱修纖立晴昊絳霄雲璈誰擊考揚許  
之君顏色好冰綃爲裳車羽葆永愍垢濁增札天湘波層瀾勢灑澌跳珠浮玉  
簸洲島一洗氛瘴蘇衆槁爰築廡廡俱終老出門倚天心惓悵玄穎浮花落縑  
縞無跡空飛詫神媪肘後藏之五色縑念君別去塵浩浩歸來歸來守其寶

送何太虛歸山中

飄飄兩屐山中雲青眼不受京塵昏意行扁舟本愛雪獨去五柳猶當門人言  
江湖在遲暮立談雙璧非謬誤相逢挽君君不迴落日蒼茫蹇驢去

同子唯賦水車

挈瓶之智誠有餘抱甕之勞亦良苦何人嘗巧挾天機河伯逡巡魚鼈舞昂昂

長身臥膝岸捲地翻濤敵驕暑誰云龍骨化梅梁未信魚身作橋柱縈紆香輪  
過流水突兀雲梯卷清雨橫陳歌板促紛綸倒流谷簾聲齟齬東家盞婦顏色  
惡步步生蓮空媚嫵陽烏流爍汗成漿平陸須臾涌銀乳推移燥溼意本同竊  
奪陰陽天所怒人言無踵能自至跬步周旋路脩阻不辭滿眼看黃雲歲晚論  
功付梁梧君不見田舍翁年年苦辛與我同天寒破褐厭糠覈仰視屋壁知誰  
窮

次韻夏明道紅梅

江南徐生圖沒骨筆底妖妍等塵物此花絕俗避春風東望扶桑入瑰室閬風  
羣仙笑清寂故遣瓊英侍巾拂龍肝麟脯厭腥臊以斗為盃飲真一嫣然乘醉  
下塵寰欲向晴空舞紅雪崇桃積李行飛翻固此貞容莫旌別效顰不語空捧  
心美好何由在糝抹懸知正色眾所忌況此纖穠逐時節憶昨歲暮天號寒炯  
炯霓裳傲冰月誰言凍吻不敢吐妙思端須續神筆飢腸雷吼空九迴勁氣雲  
摩難百折人間好語詎有盡三嗅清香應倒絕

雪污齋邢醫取靈樞雪者  
汚之之語爲號

有客飲垢如飲墨三尺之泥及馬腹平明對鏡鮮衣裳意氣摩雲飛食肉清虛  
不來空慨慷願君勿走治其狂明窗紫塵在吾鼎淨洗紛紛冰炭腸

次韻閒閒甲子雪

絳霄仙人雲作席宴坐玄關已知白萬妃婀娜布青陽淨掃嚴凝驅伍陌飛霏  
散作平地舞翦綵寧爲舊時色西峯秀筆眇何許似換當年銅綠格洛陽之人  
凍吻縮詩句那能隨燭刻大鈞有意迴昭蘇至寶無華匪脂澤乾坤偉觀雙眼  
明高臥元龍須百尺

贈錢唐吳月湖

棄右班  
學黃冠

君不見後湖仙一官掉首餐神丹月明江上杳然去唯見玉珮雲珊珊又不見  
姚將軍夜騎黑驪趨劍門飢來青城采芝食童顏逸足追奔雲人生富貴那可  
必偷竊陰陽亦奇崛陰符目與素書通赤松來歸乃真逸西湖明月不可釣呼  
吸湖光月隨照要知心與月同明暫假孤光敵清皎憶昔黃霧衝八蠻髀肉消

盡口吻乾萬里生還真幸爾十年老去猶淒然卽今落魄隨塵緣丹霞玉樹壺  
中天何年輕舉化飛鶴歸視城郭同蒼煙

送趙君佐茶使

淮南食茗如食粥清曉烹煙出茅屋生來不識太官羊翁媪相看夸不足連綱  
貢餘知幾春排檣接纜來儀真莫言此物常苦飢船中估客肉常肥

黃臨汝以長句索筆次韻

寸錐飲墨工傳書千載妙蹟遺官奴寶跗綠沈不易致葫蘆荆管那能無古來  
志士心獨苦採菽夜晝灰成圖書窗歲月要有限作計何必輸人鬚中山卯君  
被羈束論功且復歸韓盧柳家鈎鎖本新樣內史筆勢難爲徒遂令陳生擅料  
事坐出妙語如擒俘邇來入法益疎陋雞毛兔毳爭庭除姓名僅記政自可文  
采日泯終何如湖陰丈人古仙伯舊嗜寶刻窺鴻都飄如晴雲彩鸞舞勁若暖  
浪寒蓴舒丹碑翠碣已冠世所恨昨舌懷嘉謨竭來掘筆弄天巧下視羅趙真  
有餘詩成醉墨作三絕寒室眩晃生瓊琚

題翠山嗣禪師雜花世界

寶田琪柯天上種一一五采相紛披深根清寧出樂國幻境變滅卑仇池藥珠  
駢頭滴膏露萼綠擁翠攢新枝陰陽轉旋發天祕霜雪饕虐培靈基紫泥分封  
慶雲護緹室應律溫風移初疑層臺閬仙下似笑移谷愚公癡側金布地素習  
結翦綵眩晝神光奇桂宮斫斧古莫徵桃源展畫人猶疑高禪息機月窟坐微  
笑彈指靈山來嵌空積鐵不受暑垂溜挂練能成漪巧翻新好喻空假妙合頃  
刻窮施爲溝塍衍平碁局布巖谷巉削丹泉滋流鶯弄晴逞繚繞幽鳥觸影搖  
參差扶筇一觀定已駭飛觥百罰知何辭眉毛猶存眼非眩意不落相寧無詞

贈劉醫

行禁架術

君不見東漢趙生試奇術禁架相傳人莫測桑皮爲脯水爲醪耿耿千年猶廟  
食事見後漢趙炳傳今台州土神是也又不見葛稚川遠窮句漏思得仙辛勤纂書集奇怪金創

一映完如前古來長生氣爲寶踵息深深神不老肯將呼吸逐凡庸辛苦徒令  
顏色槁羨君妙契合二士萬病相酬一杯水參苓遠棄藥無功變幻須臾人共

喜靈龜枯桑終殞生雁以不鳴曾見烹誰言靜默解自致奔走岐路方喧爭我  
生守口今已瘖氣涌如山空苦心漫將寸穎寫奇崛紛紛過眼誰知音峻層瘳  
骨非食肉空洞無塵那有俗金華玉瀝端可餐要俟它年梨棗熟

次韻段惟德右司

空齋病起槐幄深碧雲道士遙相臨問之不肯說姓字笑指庭鶴知余心昔年  
種松在山北咫尺十載修篁侵公當青春立霄漢我竟日夕還山陰

子昂風林牧馬圖

駟馬不受人間齧春入川原草如髮老髯背面心已知眼底玄黃總凡骨相親  
柳下那作疎泯默此意今爲圖竹林之賢固奇士晚歲絕交真可吁

張氏女

七歲能  
大書

皎皎嬌女眉髮鮮筆墨爲未書爲田家貧畫地當縑楮能使平陸生雲煙老蛟  
翻波注甘澍渴驥齧櫪追寒泉躍如斫陣勢揮突快若舞劍光回旋青燈阿翁  
夜授詩誦聲出屋清且圓天然異質世外寶寸穎入手真如椽流紅題詩愧飄



蕩織錦作字空纏綿遶牀不憂翠袖薄玉雪晃耀辭花鈿君不聞祝融之峯魏  
氏女空中落筆垂瓊篇閉門養姑吳彩鸞一謫人世知何年道合變化難具言  
宿習妙解寧非仙

送儀上人歸天台

三百六旬塵浩浩萬八千丈雲飄飄手提飛錫絕江去獨飲古澗長生瓢乳彪  
呼風小兒語老鶴翫月仙人舞空林桂落招不來冰歇巖頭斷前路

題李廷弼歸安去思碑

人言歸安之水堪耘耔又言歸安之水宜繭絲移文夜下鄉社集折竹作度魚  
鱗推阿翁裹飯立田所大兒應官入城府篝燈夜算尖角贏百畝塗朱費千楮  
慈仁李長官眼明不識催租癡溝塍如枰舊疆理故王之籍那可毀刮毛龜背  
羞作腴掉頭據案難奉符聖朝阜民極天際山積川量一梯米挂冠徒步歸卽  
休虛籍誇浮非我計弁山何巘岼苕溪何潺湲山君水神各有職樂意禽魚兩  
相得君不聞古來吏弘羊烹劉晏死飛蛾赴膏無有已歸安之碑立如玉父老

摩挲路人讀

題董高閑道士春龍行兩圖

清泠之淵玉爲竇呼吸銀丸起晴晝昂頭躍空朝紫京海若蒼黃河伯走積靈  
爲氣翻帝車坐令日觀生模糊黃雲離離覆下地神跡仿象今爲圖

送錢唐萬戶還鎮

秋風八月錢唐潮三千組練平明驍吳王故宮草凝碧一塔突兀凌昂霄將軍  
宣威立油幕手撚羽箭調青鵬穿空盤旋彩雲墮藉草燔炙羞肝膾酒酣意氣  
擊玉斗垂手逞舞花容嬌百年繁華等流水金谷翠樹隨塵消平湖堤柳千萬  
縷時繫落日傳笙簫宴安侈習卒未盡癡兒駮女猶喧佻名王之孫古英武韜  
鈴夜誦聽寒刁徒兵晝閱逐奔馬舟師夜渡追輕舠坐令長城鎮南服疆鯢落  
膽夷姦妖煌煌輿圖久曩戢紫燕九陌嘶風驕胸中武庫貴商略談笑橫槊真  
雄超丹書之功在金匱願趾世燉輝皇朝

嗣天師墨竹

玄雲空飛着無蹟濃淡晴溪護寒碧碌碌玉石圓且奇古澗因依養顏色仙人  
紫宮朝未移平安日報春熙熙生綃陳情寫初意爲問白鶴來何遲

送趙簿正卿歸養胙城

淵明投憤酒初熟弘景挂冠丹始成何知奉輿歸故里夜聽慈竹平安聲食蓮  
分甘舍雲冷得魚入饌泉水清門前槐柳綠陰直會有雙鶴飛來迎

送保寧萬戶出鎮

古閩州

鷓鴣樹飄紅蜀帝飛錦屏橫空十二眉天狼夜沈北斗正筆花列陣書成圍拾遺  
舊題山鬼嘯文石縱橫碧苔燒將軍好文歌太平桂酒謹迎梓潼廟

子昂寒篠枯槎圖

靈柯連蜷排石角海風吹秋折繁萼亭亭明玕左右從呼吸玄雲起陰壑猛思  
誓欲窺河源從者亦返清泠淵河源露重星嵯峨清泠之淵多蛟鼉上天下天  
意沈惻化作蒼龍張素壁玉堂之仙墨成沼穎脫淋漓翻浩漾鐵榦飛光明月  
流翠節參差飄窈窕昂身突兀太古春崢嶸赤立驚絕人支頤觀象洞玄化芳

朽成歲非吾真

澧州通濟橋

洞庭水發波湯湯老蛟挾舟恣低昂  
何人空中化樓閣斷鼇爲石虹  
爲梁澧陽太守默無語  
朱墨塵深失修舉萬里南來春未歸  
離家想爾曾題柱

近有善書僧日温妙明温華亭人  
明眉山人也余嘗識明于玉几山其  
年未四十温老矣余識于靈隱視其書  
之高下亦類夫年也閏十月有僧攜明書  
示余遂各爲一章美之且記二子之出處焉

老温作書誰授訣少學潘郎繞城帖  
興來握筆弄春妍靄靄芳叢鬧飛蝶  
平生大字顏魯公晚復顛放少露鋒論功  
古法雖未至瀟灑要是僧中雄  
醉裏蒲萄墨爲骨秋葉東西雲鬱勃  
裏繒急點數玄珠不識公卿是何物  
只今書畫名已傳華亭鶴唳悲流年  
西方金仙在何天寄聲爲了塵中緣

其二

蜀明貌癯肩聳山我與之語清且閒  
聞其作書誠險艱自製美筆出袖間  
流落

金題入清笈魚鑰無聲帳中閱暎水寒尊凝素波側石枯藤挂斜月西風玉几  
雲翩翩黃衣渡江聽清猿逢人醉寫數十紙山僧示我相誇傳歐陽父子病骨  
立誠懸繼之天爲泣楚優抵掌真偶然妙解無言君合識

善之攜酒招游西湖值雷雨分韻得杯字

南山樹影糊輕煤北山雲花玉崔嵬絕憐我輩少姿媚幻此異景窮奇瑰湖光  
山色兩愁絕更挾新雨除飛埃千年龍公睡忽醒頃刻駕浪鞭春雷我生倦游  
端有意陳迹黯淡漫蒼苔擬將鐵笛寫清怨復恐翠袖含餘哀主人似怪不解  
樂故結勝侶攜樽疊翩翩六鶴舞晴翮華表清唳雲光開絕憐山雞強聯翼照  
水寒影空徘徊謝公屐齒殊濟勝偈仄蓬宇徒低摧娟娟新青故堤柳片片輕  
白孤山梅春風佳游詎易得相與一笑同銜杯

賦金華方君雙魚硯

海上鯁魚雙鬣紅振鬣直上嫦娥宮似嫌嫦娥太孤絕耿耿冰雪難爲容須臾  
海枯不可下駢頭躍入空巖罅翠藤交絡石罅深太古風雷催變化得意相忘

睡酣熟開眼重光弄蛾綠跳銀破練何足奇共飽雲腴作寒玉良工感此同死  
生冥撥巧琢存其形世人翕霍漫刎頸對此三挹顏爲赧玄英聞孫古俠士脫  
粟論交傾意氣竭來風雨泊江干拂拭雙魚落清淚平生謝子金石交詩魂寂  
歷飄黃茆此中濡毫作新誌免與俗子同譏嘲

寄張伯兩道士兼簡鄧慶長二首

寢扉曉入香爐雲尸坐朝日雙臉醺南山鐘磬似有約北山禽鳥如相聞楊枝  
低昂碧霞袖藕葉清淺青霓裙更欲深居入林壑築壇夜禮三茅君

越羅作衫花纂纂今年身長覺衣短垂虹大堤迎棹船綵袖翩躚酒卮暖還家  
閉門百不知桐葉題詩綠陰滿鄰坊爲約張隱居細雨湖橋乘款段

清容居士集卷第六



清容居士集卷第七

夫未嘗至... 袁臥楠... 謝雨... 袁

古詩 七言

煮茶圖 并序

煮茶圖一卷髣石窗史處州燕居故事所作也石窗諱文卿字景賢外高祖忠定王曾孫儀觀清朗超然綺紈之習聚四方奇石築堂曰山澤居而自號曰石窗山樵此圖左列圖卷比東如玉筍錦繡間錯旁有一童出囊琴拂塵以俟命右橫重屏石窗手執烏絲欄書展翫疑有所構思屏後一童几設茶器數十一童偃背運碾綠塵滿巾一童篝火候湯蹙脣望鼎口若懼主人將索者如意塵尾巾壺硯紙皆纖悉整具羽衣烏巾玉色絢起望之真飛仙人予意永和諸賢放浪泉石當不過是而其泊然宦意翰墨清灑誠足以方駕而無愧甲午冬十月其孫公疇出以相示因記而賦之以

發千古之遠想云

石窗山樵晉公子獨鶴蕭蕭煙竹裏月湖一頃碧琉璃高築虛堂水中止堂深  
六月生涼秋萬柄風搖紅旖旎遵南更有山澤居四面晴峯插天倚憶昔王門  
豪盛時甲族丁黃總朱紫曉趨黃閣袖香塵俯首脂韋希雋美一官遠去長安  
門德色欣欣對妻子豈如高懷脫榮辱妙出清言洗紈綺郡符一試不挂意岸  
幘看雲臥林墅平生嗜茗茗有癖古井汲泉和石髓風回翠碾落晴花湯響雲  
鏘衰珠蘂齒寒意冷復三咽萬事無言歸坎止何人丹青悟天巧落筆毫芒研  
妙理黃梁初炊夢未古舊事淒零誰復紀展圖縹眇憶遺蹤玉珮珊珊響秋水

贈張玉田

循王五世孫  
來郵設卜肆

將軍金甲明如日勒馬橋邊清警蹕淮壩徹衛羽書沈置酒行宮功第一蟬冠

熊軾填高門英英玉照稱聞孫

張鉉號約齋  
堂名玉照

百年文物意未盡玉田公子尤超

羣紫簫吹殘江水立野雉驚塵暗原隰夜攀雪柳踏河冰竟上燕臺論得失丈  
夫未遇空遠遊秋風淅瀝銷征裘翩然騎鶴歸海上一笑相問誇綢繆兩矐奔  
飛互朝夕璇府森芒蠹莫測要須畫紙爲君聽落筆雌黃期破的壺中白日常

高懸道逢落魄呼醉眠清歌停雲意慘淡倚聲更度飛龍篇

題子昂浴馬圖

首藉原空雪新積羣馬飢鳴渡江食大梁公子心未平一匹宛駒萬夫敵圍人  
初浴意氣增跨轡已晚知無成雲窗徘徊無語掩卷索索猶風生

送倪德進歸番陽

書眸的的垂玄珠辯口落落傾冰壺寶刀挂壁指閭闔扁舟挾浪辭東吳低昂  
黍禾故流道隱沒桑棗遺宮墟仰看浮雲勿復語俯視逝水誰爲圖天衢晴塵  
接冠蓋石室古簡搜盤孟大宜置身並班馬小卻論事追唐虞懸知擔簦要有  
得永愧折簡終難呼深春無人碧桃靜落月在屋冥鴻俱歌聲清琅振金石筆  
意橫逸搖璜琚苦心豈爲爨下木帖首不作轅中駒牛毛取士固當走魚目眩  
世徒爭姝平原飛埃宿麥盡長河奔潦柔桑枯還家勿陳賈生策閉戶趣著神  
農書相思我亦返屠肆靜念子豈淹田廬

送僧德芬過松江

海門山人捐竹杖笑指飛濤挾雙槳雲間鶴唳耳不聞洞下龍歸夢猶想我聞  
諸天亦官府一息塵寰總調御黃花滿院人跡稀霜月離離在前戶

憶陳道士

空巖羽人氣爲祖玉立秋空振玄古酒酣高歎裂行雲直上鈞天聽濩武白雲  
一去誰遺情掉首不問人間名當時雙瞳傲餘子猶有翰墨傳孤清紫綸交馳  
丹闕下人道山中多僕射黃金蛻骨碧藤深夜半寒光明月價飛鳧縹眇山鬼  
靈蕙殺一薦端貴誠欲從桂父乞仙露虛牝回激笙竽聲

病馬圖

青絲屈曲長安道卓午歸來殿中老側身仰天思遠遊口不能言顏色悄奚官  
卻立深有疑似言非病那用醫願乘長風迅絕足一息八極歸瑤池

次韻張伯雨梅花島

雲屏油幕低覆垂晴日倒映黃琉璃孤根自有巖壑趣屈曲緹室情依依魏峨  
青女來蘂珠赤脚獨立層冰渠燧人當陽朝寶鑑金胥簇陋催銅壺何人胸中

藏九島內火迴環不知曉咄嗟已辨天機深頃刻能成化工少陰陽在手司帝  
春坐窗更試明窗塵江湖遠涉汝良苦門外萬竅笙竽吟

次韻渭川春玉圖二首

至人虛心實其腹手種琅玕如種玉晴雲散墨春思浮咫尺經營千畝足清標  
亭亭儼矜絜笑脫斑爛賜膏沐揚旌植蠹神君遊萬籟無聲江水淥此君之志  
那可量榮辱相忘在空谷大宜蓬萊之三山小宜武夷之九曲前如綺園歌紫  
芝後若夷齊侍孤竹隄麋之墨清且奇脫落玄黃乃真目幽齋尸居耿相對有  
客叩門深絕俗天空日沈碧雲湛細酌寒泉茗秋菊夢迴倚杖森在廷燿燿雙  
瞳鬢深綠

瑤林羣仙歌捧腹解帶蘭皋捐佩玉深知五采眩空花守墨空巖思濯足層冰  
急雪成九轉重露輕煙方一沐湘君寶瑟調初絕唯見遙峯蘸寒淥長空旋宮  
起萬籟翠袖無言守山谷紛紛落葉漫渭水耿耿殘花守韋曲論功歲晚端有  
意深愧羣英不如竹森然壁立聯堵牆變化淋漓傾衆目高人宴坐不出門一

榻常懸謝囂俗每令此君當上坐末席餘清友松菊回首故園新雨晴無盡春  
風吹草綠

忍恕堂 大都袁氏

汝南堂堂臥雪翁飲寒閉戶稱高風吳相亡何不知止二石醇醪能脫死吾宗  
高標兩都史餘子紛紛那足比人生遇事何強嗔百年歲月籠中身水清之魚  
鈎滿餌白鶴出林紅鶴忌君家兄弟如聯珠熟視不語疑模糊連理之木多慈  
烏大兒拱立羣雛趨家僮大勝千木奴冬園芋栗夏芙蓉壺有美酒架有書不  
識喜愠真何如門前駟馬填華裾

飛鴻軒 新安胡則大

冥冥天機衝紫霄炎洲雪嶺窮遊遨鷓鴣一枝掩目避始信懷土非吾曹勞生  
貴賤各有適攘臂何人限南北三足之烏今不停寒暑周迴短長刻

李士弘枯木風竹圖 為玉隆陳又新作

狂蛟舞空蒼髯拏雙鐵蒙頂雲交加亭亭霜標不受侮慘澹天籟扶槎牙西山



古淵人莫測一柱承天萬牛力會須截玉化陂龍拂拭苔光遺劍跡

題茅山道士雪梅障

積金峯頭雲五采天女行空散珠琲爲憐絕壑一枝春玄墨敷調增蓓蕾因風  
飄零顏愈真竟日霾藏氣逾倍油燾紛紛成素旄積鐵離離增練鎧坳如側杯  
頰承露亂若鈿刀續翦絲雙龍挾轡擬欲上萬馬飛塵卒難挽高齋鍾磬日未  
暝徙倚橫斜眩銀海憶昔西湖極遊歷真與逋仙澆菟器後知色相端有空百  
念灰心付真宰峨峨茅君儼不死秦帝嘉平年首亥精思萬林元炁存衆卉羣  
芳羞皚皚閉門緹襲坐蒲團長恐夜深風雨改

廣信奚君靜能家鵝湖以太府掾出補南康簿予慕其仕止皆武夷先  
生講道之地敘言其異同幾於贅因成長句亦欲知夫先賢箴警非二  
途近世學者駸駸虛玄則知武夷晚年持守之論非矯可不慎諸

鵝湖盡日鐘磬清不聞昔時絃誦聲愛君卜居在其側編簡插架猶談經當年  
羣公水蒼珮粲粲寒芒德星會投壺雅爭非世情餘子承風增毀背康廬招提

無極篇希夷入道從茲傳百年脣吻互嘲鄙經緯妙密同先天兩地斯文實元氣宦遊家居總奇事稽古紛綸三萬言顏生屢空心晏然

次韻王道士

丘真人弟子其韻不雅馴姑答其意

潭潭古仙浮玉顏憫世壯志金城堅丹霞紫壁接霄漢過客弔古猶思賢王君碧瞳水蒼珮深恨望諸書絕燕丘公蟬蛻七真化青史誰能繼二班

送馬季權之官平江州

碧梧丞相兄子

咸淳十載兵塵高漢江之水纔容舸眈眈太傅亂天緯櫂船兩翼鳴春濤中書蛛絲守空印片紙除書魚貫進相府門前青草深破席疎簾雙白鬢扁舟疾走歸番江百城破竹爭迎降紛紛成敗付野史玩芳纓臥唯軒窗往事淒迷踰四紀華屋空梁歸逝水洞庭木葉三閭愁淮南桂叢八公死京城即今相邂逅傾蓋忘年總論舊潁州推官家譜傳岳陽樓頭水浮天

宋誠甫押送交趾使之武昌

飄飄蒼珮乘風來下視漢水如浮杯坡陁環堤舊亭障鐵笛穿石聲崔嵬武昌

之魚不可食昔人作歌何寂歷隔江小城大如斗枉使邊軍暖鋒鏑古來相傳  
用武地今作薇垣鎮官吏猩血繁纓金齒來犀皮屬甲雕題至碧瓦門深鼓角  
高羅庭椎髻聲嗷嘈銀甕蒲萄雲葉重錦氎叱撥風花驕深知王臣有奇算蠻  
使低頭輸密款勸君莫登黃鶴樓勸君莫停鸚鵡洲黃鶴之人白雲杳鸚鵡之  
客蒼煙愁愛君手中青鏤筆能寫牙籤三萬帙迄今舊史難整齊屢屈先皇詔  
頻出玉堂日正槐影長汗青之簡光熒煌請君直書亡國事還作觀風寰宇記

送濮陽陳景皋之官忻州

陳侯直氣摩青雲天馬脫駕羞驚羣毳袍昌言高坐聳餘子俛首卑塵氛探囊  
奇策得要領炙轂妙語通氳氳京城久居閤冠蓋酒觴棋局忘昏昕平生植竹  
嗜好古膏沐服食童顏醺往年濟陰試敏手桑柘戢戢春田耘政成烏府考上  
上擊鮮釀秫歸榆枌窮冬邂逅色骭隣近錫符竹州名忻自宜骨鯁任獻納或  
佐輦轂輸忠勤羣公歎息各賦詠跋馬操袂愁離分緬思河東舊雄鎮甲騎出  
塞宵踰汾卽今樓臺歌響集棗下纂纂紛紅裙愛君胸中人物論發剛破的無

虛文蓋公之堂本清淨解帶臥治收奇勳此君相從匪朝夕書簾煮茗看鑪熏  
送湯道士降香武當山

紫衣山人眼如月朝捧天香辭鳳闕柳絲輕拂桃花驄屈曲層巒過俊鷲澗中  
黃銀如僕姑清淺閃爍隨菖蒲水流東南天轉北橐籥妙化誰爲圖沈沈玄帝  
道淵默手握神機合無極密調六氣佐璇璣魑魅潛藏百神職暮春之初傳降  
靈閱世已久難稽評龍虎之章端莫測龜蛇之光杳無跡

過高郵湖

七十二湖春浪濃風刀翦霰跳玲瓏參差凍柳皂纛重偃首俟命朝珠宮淮南  
田父身龍鍾灼龜瀝酒占年豐舊秋積水挾豐隆長魚揚鬣蒲蕩中桑顛高下  
棲冥鴻黑禾生耳隨飛蓬瓢囊扶攜出城東至治天子達四聰詔書寬大蠲民  
農秀麥葦葦翠織茸赫日出海扶桑紅歲熟於酉年相逢擊壤鼓腹歌時雍展  
牲美報湖神功

趙昌荷花

我家東湖三百頃，瑞錦縱橫綠雲凝。森森曉氣天香飛，星斗光沈水花淨。遠如  
嬰兒脫文線，近若胎仙臨玉鏡。瓊杯欲側兩絲垂，金掌初調露珠定。盡將機心  
付鷗鷺，小雨輕煙穿短艇。京塵烏帽二十年，夢入滄洲寄清興。趙生畫意不畫  
格，淺粉輕砂養真性。韜精斂容羞自陳，三沐無言月華靚。邇來馮於號能事老  
嫩風晴，毫髮證玄黃已辨。神俊枯逐影之人道中，病高堂視此青琉璃。香色俱  
忘保清靜。

京尹旌門

泰山之溜石可穿，磨磚爲鏡不問年。人生作事貴苦堅，砥節厲行通蒼天。武清  
之祠世所傳，出門重趼神已憐。五里一堠拜漸前，寶鑪當胸起霏煙。念我母疾  
醫難痊，帝叱二豎沈諸淵。秀眉鶴髮人中仙，伯仲叔季舞蹠躩。脩齡已盡銜苦  
冤，烏傷柏慘羅墓田。劉愷丁鴻孰爲賢，煌煌神州風化先。槐柳表道綽楔懸，搢  
紳交喜聯序篇。太史屬筆慚非椽。

乘鸞吹簫圖

繆公荒淫亂天紀纍纍宮中四十子懷羸復作重耳妻匹盪相揮國深恥娉婷  
弄玉誰復看參差窈窕能合歡築臺虛聲出天外詐言後夜同乘鸞人言神仙  
能不死橐泉之墳露遺址哀哀黃鳥飛復來良藥刀圭竟誰致高辛之女隨盤  
瓠漢愁匈奴遣公主一身能解百城圍鄙計咿嚶笑千古天台之事尤荒唐劉  
郎阮郎歸洞房石橋雲深樛木冒披圖相看儼同傳

雲岡圖

爲王叔能作

白雲晃晃虛飄飄羣峯磊砢通危橋蒼髯側挂截地脈素練直下來山腰是中  
樓閣誰所居翠篁高拂寒光遙憑虛望遠意莫盡振衣獨立搏扶搖王侯出守  
山水郡逞懷盤礴窮清寥一日不見輒憤憤臥遊想像歸生綃信知俗子謝不  
去濟勝有具難爲招

贈吳江宋尉

太湖三萬六千頃穰秬秋風政相並吳船跳擲如飛梭鴈參差白雲影連年  
田舍無炊煙吳船出沒平湖前縣官打衙入湖去弓刀夾棹魚升天元憲之孫



爲少府岸幘看山揮玉塵飛蝗避境虎渡河吳船雖多奈我何

與相士五月屋

世途紛紛黑如漆暗中摸索端有術何人竊藥廣寒宮碧眼淋漓論得失聾頭之子藍且醜牙籌夜深鬼神守麟臺功次不論渠當道相逢須疾走

廬陵梁醫濟生堂

上池之水人莫識三揖東華借餘瀝瞳光透碧千里懸二豎蒼黃離衽席南康昔有劉神醫鶴骨變化芝尤肥入門逆意望且走吾今見子同其機

次韻史允叟檜屏

蒼雲之根百歲植巧匠屈曲空揉蟠淨如翡翠立亭下矯若么鳳依闌干崢嶸要使頭角出鞭霆駕電超雲端扶春萬條豈不好猥瑣籬落迎霜殘君不見姚

江參天兩雙檜至今風雨之夜猶清寒

越王尉餘姚嘗植雙檜於尉治

次韻蔣遠靜

蔣氏祖五代末與僧爲友僧落魄乞食市中六七兒常負囊從之一日與蔣浴江中視其背有目蔣驚異是日僧化

去迺彌勒也留布囊與別且云蔣氏子孫當代有進士

唾壺塵尾手所持白眼對客客不知出門俗子多敗意三語之掾真吾師曉窗  
新沐綠陰淨碧雲奇峯生九疑隔隣書聲入幽耳茶甌散花酒浮蟻百年行樂  
在適意燕頤頭顱空萬里君不見燕山俠客多苦寒出門悲歌來日難

同龕彌勒誰總持沙上偶坐忘所知布囊相傳陋七葉密記端是人天師愛君  
清言漱金石酒酣硬語輕丞疑亦知造物端戲耳一室尸居旋磨蟻東鄰花發  
西鄰歌咫尺相思隔千里陳郎之約不可寒我眠卿去人所難

廬江羊孝子兵難時兄弟三人與其母被掠為奴後廿年復得完聚郡

表其閭

君不見觀津竇廣國傳舍沐頭深記憶時來徒步入長安握手相看淚如滴又  
不見杜羔孝感為尚書兵前失母長歎歔一朝老嫗忽邂逅即君玉貌猶吾夫  
淮源鐵騎排雲來戰骨積雪飛寒灰小兒纍纍繫馬尾鬼妾赤脚驅車迴黃塵  
漲空日將暮母子弟兄不知處只今總是太平民那識當年亂離苦人言缺月  
定有圓馬能生角石可穿亭亭高門拱槐柳更灑鴻筆傳青編

送潘元卿續溪邑諭

君不聞黃山種松法纍纍如珠苗如髮十年拱把百年梁華表相看化鑿魄又  
不聞婺源之山高入雲黃流夜作河漢奔醜渠漩渦濟川具帖首萬折歸天門  
魯中之壁神所惜龍馬成圖帝爲錫韋編索隱年益耆此道誰言深默得紫陽  
老人心胸高番髮執簡窮秋毫卽今羣經束高閣上擬混沌中唐堯拱手皋比  
立環堵哆口紛紛角門戶君看黃山之松婺源水師友根源政相似

次韻黃松瀑自廣信見寄

開元天子書石經雉頭焚卻邊宇寧合宮宗祀廣致敬底用物馬登云亭林林  
碑臺刻新出嘉禧殿前稱第一小臣捧詔渡江南蠶尾渠眉耀晴日裝成分賜  
諸王宮餘墨淋漓遍孤棘古文僞出今文訛斷簡誰能究佔畢黃仙盡日鉛槧  
忙語言冰雪容堂堂明時孝治邁千古願借鴻筆歌陶唐

時奉旨刻  
八分孝經

題黃居寀蒼鷹擊雉圖

坡陁肅秋塵四起逆風雉飛疾如矢蒼鷹矯矯凌空來注目穿胸紅披靡山雌

藏頭入荒篠回視其雄端一死玄雲磨盪寒光浮側身番雲轉輪翅急如冠軍  
赴猛敵緩若計士藏深智蜀山魏高翠周匝狹徑交衢不容駟黃生養之愛神  
俊勇氣縱橫怒盈皆想當落筆望平坂回首當關真劇戲君不聞箕裘可學端  
有傳諸孫射生養殘年

黃筌養鷹學畫鷹  
諸孫皆成獵師

送廬陵陳存道赴廣州教授

君不見端平崔相國竹杖角巾老辭蜀清名高節耀千古寒菊孤香出林谷又  
不見咸淳張狀元落落大對三千言流離抱忠葬魚腹要使名字傳遺編即今  
聲教震南朔此州文獻端磊落荔枝一色紅雲蒸菖蒲九節清溪明當年中州  
人物論風度曲江之公唐帝顧吳儂僮父互譏評坐使官曹異銓注吾聞入桂  
山峯如玉簪衣冠之氣連青雲穹龜負碑百神拱色羊跨乘羣仙尊翩翩陳子  
天都客萬舞充庭考金石笑觀滄海陋浮漚鵬飛暫作天池息

送毛道士降香嵩衡淮海

我所思兮在嵩嶽神清之洞何駭愕參差弄月秋氣高王子飄飄醉騎鶴少室

山人蕙帳空君今駿馬凌春風山中齊聲呼萬歲我欲同君學蟬蛻  
我所思兮在衡山重華玉珮聲珊珊芙蓉石床秋水冷木葉飛燈光耿耿軒轅  
道士人不識澗底拾薪鎔白石我欲與君上九疑萬民樂康明聖時  
我所思兮在桐柏寥寥帝鄉今莫識潛流倒注平淮成天塹曾爲萬人敵金龍  
護簡帝令森蜥蜴俛首穹龜沈我欲與君探其底五兵長橐樂平世  
我所思兮在南海鐵網珊瑚援手採沈沈雲氣方壺深絳節神君似相待海中  
颺母方頑癡朱書短札能捕之此中奇觀通扶搖吾欲與君觀沃焦

贈番陽劉生振

我欲贈君珊瑚枝君言不如貽我雜組辭我欲贈君懸黎珠君言不如貽我盤  
盂書長衢飛塵日卓午觸暑東遊甬江滸目光陸離衝紙背徑上河源窮織女  
龍圖龜書杳無跡弄丸冥搜矢穿的空林看天無底青虛室生雲十分白幽蘭  
叢深不當戶盤露凝膏敵瓊醕泰山積溜石可消鐵硯玄花散晴乳林林白袍  
校詞藝鷓鴣淬鋒儼初礪身同蝶化入寥天欲伴飛仙更斫桂彤庭會弁開祥

雲河目海口真天人昂昂胸中治安策慎勿謾與深彌綸萬里之行生足下黃  
河層湍及奔馬參差柳色暗皇州龍榜高懸動朝野

句曲山迎真送真詞二章

往歲在翰苑嘗草三茅君制書近張伯兩道  
士寄示陸魯望句曲山朝真辭二章蓋每歲

大茅君十二月二日相傳絲天台歸茅山春三月十八日復歸魯望所  
製迺十二月而三月獨缺予不揆用韻以補後章

率字作學呂道士過三茅因書以寄且為異日  
朝真之資伯雨詞氣清簡必以予言為陋也

參差窈窕行雲急翠旌飄飄露華濕神君夷猶疑未來矯首精思各山立瑤臺  
章徹星斗冷碧扉丹透紅流影春雷迸壑人不知獨鶴眠松已先醒

右迎真

妙顏朝迴寶衣解乘龍高駝賦邁邁山中老人年送迎一酌寒泉過玉漉翠氣  
紛霏森孔蓋挾以流鈴光纒纒帝子高歌歸去來白月追雲送飛珮

右送真

龜蒙詩云九華磬答寒泉急十絕幡搖翠微濕司命旂旌未下來焚香抱  
簡凝神立殘星下照霓裳冷缺月纔分鶴輪影空洞靈章發一聲春來萬

壑煙花醒縈雲鳳髻飄然解玉鉞玄竿儼先邁朝真弟子悄無言再拜碧  
杯添沆瀣火鈴跳躍龍毛蓋腦髮青青報纒纒萬象消沈一瞬間空餘月



外聞  
殘珮

贈呂與之

碧窗獨對中秋月似怪腦華雪霜白瘦筇直上大茅峯長吟冥思啓玄籥綠蘿  
丹騰紅欲走我欲捨之難在手嗇精超形朝紫宮下視塵寰等蒼狗

送瞿伯器還吳

輕鷗不受機心縛良馬端隨敏手馳鄞江井邑十萬竈簿領積几窮緡披瞿君  
坐曹談笑決長官驚誇里閭說豈惟煮茗挹清風復解停杯問明月澄江雪浪  
催歸舟洞簫聲咽行雲留明時掄材在濟用佇看公府文章酬

竹素園

細帙不作飛白體漆簡端微殺青書哀哉瀛王兔園冊自比稷卨今何如陳生  
歌聲夜漫漫手織雲錦餐琅玕丈夫書功夙有願篤節束帛光丘樊

松聲樓

層樓突兀觀芸芸萬籟沈寥天地分初如盤車出層巘宛若幽磬穿孤雲上方

禪寂念不起但見白鶴來繽紛金鐘風篁儼相答有客掩耳元無聞

阮受益攜郭功父杏山詩來求題迺知爲名門所作因次韻

葛翁迎曦侍東皇笑指梅根之陽岡手揮桃李植文杏春至古澗流紅香杏華  
飛時爛林谷錦繡爲天漫翠木卽今不識空陂龍猶指當年舊乘鹿紛紛機事  
危黃間彼艾之植誰猗蘭青松迴風太古籟移居之老時回環兩曜跳丸今幾  
載阮氏隱居端儼在金章紫綬先譜承鴈塔龍門耳孫待翩翩俊翮海門山我  
欲挾之周九寰精思羲皇粹六籍迄願閉戶窮鉛丹支辭濫說眩媠母正色危  
坐當前顏神仙之說不可學月窟謹視環中環

送林以道歸枹蒼

書生作官端作勞撫拾歲月如聚毛行年六十甫墨綬又見納祿還林臬磻溪  
之翁誠有道采芝妙顏夸不老明時貪賢在壽俊未信吾徒竟衰槁君家周官  
擅彌綸經緯表裏通天人那能望塵拜太守振衣黑髮前旒陳松花霏霏散黃  
霧春盡還家美無度篝燈讀書目光曙承明之廬我當佇

題明皇擊梧桐圖

胡兒手持玉環侍君側  
睥睨阿環非一夕  
宮中秋葉奏清商  
笑擊孫枝工按抑  
嶧陽之材雲門曲  
能使薰風生衆綠  
如何促召羯鼓催  
鬧紫妖紅看不足  
馬嵬坡下催進程  
琅璫檀板悲霖鈴  
緬思康衢擊壤叟  
帶索行歌不知老

清容居士集卷第七

Vertical columns of text, likely bleed-through from the reverse side of the page. The text is mostly illegible due to fading and bleed-through.

清容居士集卷第八

元 袁 桷 譔

歌行

吳船行

吳船團團如縮龜終歲浮家船不歸茅檐舊業已漂沒一去直北纔無飢清晨  
 煮茶茶味惡薄暮熬壘壘力薄不憂江南雲氣多止畏淮南風雨作去年水淺  
 留金溝今年水深上新州終朝但知行客苦盡歲不識離家愁大兒跳跟新九  
 歲小兒學行篷作地維舟未解釘舟牢盡日彎篙仰天視吳人不解釘船頭娶  
 婦通姻譜知是淮南捕魚戶寄語鄉儂莫怨尤宅年水深為汝憂

淮船行

淮船船薄薄如紙客行船頭怒如鬼布衫漆黑鷗雙拳邂逅相爭渾欲死船長  
 不識丹艧巧卻識江雲似飛礮風來急鼓響鼙轉艫爭篙復喧鬧淮東燒鹽  
 白如玉我船輕行一萬斛淮陰米麥如京坻我船破浪帆如飛為語吳儂莫相

勝昔日汝輩同嬰兒  
蜿蜿淮山起晴翠  
船已辭鄉不相對  
轉蓬宅日望江南猶  
勝當年吹出塞

越船行

越船十丈青如螺  
小船一丈如飛梭  
平生不識飄泊苦  
旬日此地還經過  
三江潮來日初晚  
九堰兩慳河未滿  
當時卻解傍朱門  
醉眼看天話長短  
年來官府催發綱  
經月辛苦鬢已霜  
布裘漫作解貂具  
入門意氣猶猖狂  
自古魚鮭厭明越  
明日今朝莫論說  
買魚沽酒不計錢  
被髮江頭傲明月  
勸君莫作越船婦  
一去家中有門戶  
沙上攤錢輸不歸  
卻向鄰船盪雙艖

清明行

東風吹柳鵝眼新  
家家清明忙殺人  
微雲細雨作春色  
輕車急馬團飛塵  
大墳崇臺鬢花石  
新檜珠幢當戶植  
小墳纍纍俱土堆  
高下尊卑人莫識  
豚肩韭餅雜珍味  
水飯飄零多古意  
把杯直欲酌重泉  
頰首填膺下真淚  
須臾無言各環坐  
折柳攀桃爭噉炙  
新愁已向眼前寬  
舊事翻疑夢中過  
行客徘徊亦留勸  
薄



暮狂歌下前坂悲歡盡日總春風白髮年年不知換君不見江南卿相墓五鳳  
飛樓鎖煙霧諸郎錢癡恣歌舞不識當年出勤苦楊花飛盡猶不來空有啼鳥  
滿荒樹

河船行

黃河之船如切瓜黑金鋪釘水爬沙高桅不肯著船底四面綯索相交加輪困  
薪稿浮山來淮船爭避吳船開往回南北任衣食不學蕩子多嫌猜好風千帆  
亂流去我獨抱辛走行路從來宴安多後虞一失天公不相顧解凌已過桃花  
來黃河正月爲解凌水  
二三月爲桃花水沂流九曲揚飛埃不聞赤鯉上天但見魚鼈爭喧逐

船前養驢豕同圈借力於驢共牽挽莫嫌我鞭太麤毒大勝江南人代畜

鞦韆詞二首

鞦韆高整垂楊樹紅綠周遭華表柱誰家女子惜餘春東擲西拋不停住不停  
住日將暮莫送飛花上天去雲間緩聽玉參差爲問乘鸞在何處

河外吹沙沙衰塵鞦韆架上望行人桃紅柳綠今如許卻背春風踏沙路踏沙

路不歸去流鶯紫燕驚相語  
明日清明應未知回首江南夕陽暮

天祿硯滴歌

爲瓠山  
參議作

君不見南陽宗資墓傍地刻石棱棱絕相似  
荒榛暗草風雨頑墨本摩挲了無意  
又不見光和玉堂銅作模爬沙引水如渴烏  
清流我輩不堪用空與乳臭供歡娛  
那似南唐李中主玉軸牙籤日容與聚金爲寶化黃銀  
一寫形模足纖鉅口銜紫芝不敢茹微捲清波恣吞吐  
千年異質變真態晝日書窗起煙霧慵軒  
老人金鑿仙筆底萬斛醜醜清泉坐令口吻不敢燥  
俛首效用誇無前麒麟瑞世那可忘  
獬豸觸邪誰願憐要知此意政相類肯與石鼎同烹煎  
憶昔漢家劉生滯空閣青藜一星墮飛魄被將辛苦了  
殘年猶勝時人譏寂寞江南病子塵滿骨萬事無言成鶻突  
願求一滴洗餘昏卻怪王公無長物

新安芍藥歌

送胡伯恭  
之婺源

洛陽花枝如美人點點不受塵  
土嗔輕朱深白鑄顏色高亞綠  
樹爭精神那如新安紅芍藥  
透日千層光閃爍碧雲迸出紫  
琉璃風動霓裳凝綽約我聞種花

如種玉盡日陰晴看不足微雲澹蕩增寵光細雨輕濛賜湯沐何人看花不解  
理香雪紛綸手中毀酒酣跌踣空低昂得意須臾竟如此翩翩驪蹏雲中君愛  
花直欲留青春青春如流欲歸去明年看花君合住

天瓢歌

天瓢之液如黍珠緹以十襲拱萬夫帝青寥寥誰可上回風扇全揚焦枯何人  
夜坐守瑰室九關清嚴集虛一河車歷錄雲迴環帝鼓奔騰山鬼泣中有一老  
翁絳旂朱幘鞭飛龍手持赤字書直入玄冥宮取瓢上天去羲和側馭追豐隆  
人言此瓢不易倒瞬息人間成浩淼聊將戲劇轉清涼玉散珠跳爲渠好積神  
爲寶寶乃成語默變詭通仙靈丹臺紫府杳無跡丁公壬女徒多名張侯之妙  
不可詰見月入水月豈濕解衣倚樹寒滿襟遠視銀河暝如漆

晉寧丁節婦歌

明月何團團不照孤飛鸞妾心無虧盈留作白頭看堂前青桐樹慈烏旋繞來  
無數朝引三兩雛返哺日落聲嗚嗚誰人挾彈闕我烏守樹長泣眼爲枯人生

莫作陌上花東風飄蕩隨泥沙望夫之石何亭亭不如長衫立素屏流梭夜織  
燈青熒黃姑側聽中屏營天帝與植雙桓楹木盤可鑽河可塞千年苦心誰復  
識

哀牢夷

送張子元  
僉事雲南

哀牢夷蒼山疊翠雲無梯洱河西傾去無底晴日倒射紅琉璃相傳沈木兒背  
坐曾遨嬉築城蜿蜒似龍尾千古髯君乃其始縛繩駕長橋皮船中蕩搖危巔  
石樓高百尺子孫生長今漁樵空林明月手可拾仰飲飛流鬚髮濕寒藤宵徑  
側足行飢猿兒啼鼠人立慘淡虛無間烏道開人寰峨眉東望止一髮參旗玉  
井閃閃上下隨躋攀君不聞木皮岡前九折坂客行胡爲車欲返又不聞青溪  
關上三礮城纍纍戰骨耕未平輕家許國要有道豐饒是翁誇不老張公子當  
有行繡衣青春照瓊英笑跨紫燕辭天京朝餐五粒之松子暮食側生紅入齒  
從來蠻客尊漢官但飲亡何端有理南飛鴈足何憧憧不能與日隨西東相思  
望君日西下去天一握疑有雲氣時相通

安南行

送李景山  
侍郎出使

輶軒使者安南來紫泥封詔行風雷濕雲翻空海波立鐵網山裂狂蛟摧神京  
煌煌鎮無極火鼠燭龍窮髮北彈丸之地何足論蚯蚓爲城霧爲域瘴江如墨  
黃茅昏羣蠻渡江江水渾千年白雪不到地十月青梅猶滿村赤脚搖脣矜捷  
鬪竹箭藏蛇雜猿狖強曾誇井底蛙低徊自比泥中獸龍飛天子元年春萬  
邦執璧脩臣鄰朱干玉戚廣庭舞笑問銅柱今何人君不聞重譯之人越裳氏  
有道周王輸白雉又不聞防風之骨能專車神禹震怒行天誅李侯桓桓水蒼  
珮舌本懸河四方對後車並載朝未央稽顙九拜乞取金印歸炎荒

次韻黃可玉古墨行

寶刀曉割千歲松神膏磨盪長檠工明窗飛塵散玄粉匕劑直與黃金同澄心  
欠伸初睡起綺疏碧芽烹火龍金星濡毫試輕重雪跡點點留羈鴻嘗聞老奚  
對膠法經月下擲清池中蟄如寒蛟纏鐵柱霹靂光紅與神遇晴暉淡蕩浮雲  
陰咫尺鍾山隔朝暮潘郎再拜口流涎手揣不敢汗其甌睿思殘珪密封識舉

世那得窺完全絕憐江南文治極清賞沈著忘籌邊玉清峨峨墨卿泣此寶脫  
幻今無傳星灣寒泉白雲宅中有舊物懷杯圈銅魚飛符不易合金釵留股那  
有緣撐腸拄腹貴善用知白始解玄中玄暮年長物等嚼蠟借此寓意哦詩篇  
鄭公諸孫保遺笏滌志黽勉窮韋編慎勿小智窺寥天嗚呼李生之墨三百有  
幾年不如陳郎墨守行千年

李宮人琵琶行

先皇金輿時駐蹕李氏琵琶稱第一素指推卻春風深行雲停空駐晴日居庸  
舊流水浩浩湯湯亂人耳龍岡古松聲寂寂歷歷不足聽天鵝夜度孤鴈響露  
鶴月唳哀猿驚鷗絃水晶絲龍柱珊瑚枝願上千萬壽復言長相思廣寒殿冷  
芙蓉秋簇金鵬袍香不留望瀛風翻浪急興聖宮前斂容立花枝羞啼蝶旋  
舞別調分明如欲語憶昔從駕三十年宮壺法錦紅茸氎駝峯馬湏不知數前  
部聲催檀板傳長樂晝濃雲五色侍宴那嫌頭漸白禁柳慈烏飛復翔爲言返  
哺明當還朝進霞觴辭輦道母子相對猶朱顏君不聞出塞明妃恨難贖請君



換譜迴鄉曲

渝州老人歌

新城彭大雅築

渝州太守築城瞰江堅且牢月挂斗柄山鬼號州民纍纍下江去蜀水入漢纔容舫渝州何噉嘈攀緣翠木參井高不愁灑灑作人鮓但願浙米雲安去如馬憶昔彭太守晚得一州大如斗征西將軍華表柱白鶴不來猿狖守小兒舞槊紅離離大兒挽車上棧遲渴飲古澗之層冰暮宿古松之危枝渝江之水人馬瞬息渡排石列柵猶支持年年草青記新歷不識烽火平安是何夕赫日涌紅輪金雞飛報渝州民空梁燕回候歸語小牆花發舒啼痕渝州老人面如漆家住金陵年七十含辛老入巴江路猶記墳前白楊樹前岡甕崩流後岡蚓成丘社翁相詢傳父祖里婦驚猜訝吳語澆酒酹墳封四尺程氏之墳從此識君不聞武擔之山五丁土歲歲春風啼杜宇

大雨醉歌

寄王待制

海風吹天黑嵯峨九衢積溜分江沱壤牆羣蟻上枯木方池遊鯉跳鳴荷似聞

南鄰王學士閉門把卷工吟哦高張障泥倦行水垂簾倚枕遊槐柯北鄰老生病無力玩易忘象窮羲媧垂楊詵詵翠旄舞幽葵湛湛朱顏醜憶昨祠宮醮雷所被髮繞甕揮且訶縛艾搏泥肖龍狗嘆酒噴霧刑牲鵝寸雲在手不受令挾以風伯飛麈廩虛皇神功絕聲色髯羊帖首辭巖阿君不聞夸父逐日死飲河愚公避影跡愈多曹相畫一日亡何草廬高臥梁父歌板築飛詔起雲蘿百年兩曜如擲梭志士惜日鬢益皤會須深泥絕行道免使褊蔽之士肩足相累摩

龍尾歌

送文子方著作調官雲南

朝辭龍尾道暮往龍尾城七尺遊龍當道鳴春雪未解四蹄輕憶昔哀牢夷來漢賓蘭倉夜渡歌苦辛皮船之浪墨雲沈沈繩橋之雨青泥淫淫登山採桐皮側見五粒松手攀欲入口疑是沈木背坐慘澹悲回風鳥飛不能住哀猿忽相逢旁有儋耳翁爲言太古之遺蹤諸葛丞相章郡王村村列祠堂瓢笙銅鼓羣巫舞牛殺蘭藉羞瓊漿六詔之王無曆紀唐帝傾師邊將死建隆天子不用武玉斧手畫大渡河兩股蠻酋易馬來黎雅恣言茶錦不當價神武皇帝開聖元

雍獮窟穴張王官篋筐歲入長安道賈客辭家不知老文著作聽我辭去天萬里夷民疲織罽瀝猩血煎金鑄裏蹠夜行稠門夷疾追平明出關面如泥卻來京師望塵拜族金毳袍向市賣文著作今典雲南之選部目光透牘提筆署翦彼荆棘薰蘭當戶西南之人手加額太史重脩考功格

月海歌

水國紅葉下萬山白嵯峨扶胥無垠接天際望舒力挽沈金波人言老蟾那有光爲借三足之鳥起熒煌烏已入地蟾在天此說詎得然或言大塊蓬蓬氣爲主浮空五色神后輔顧菟在腹不得吐下入八瀛金碧聚貝宮樓臺珠結戶穹龜前驅老蛟舞千人之目皆在水各持一月得歡喜夜闌斗轉銀河傾變滅消沈去無趾

敬亭歌

送鄭子實  
遊敬亭

棗實纂纂羅衣單抱琴背日隨鴈還今年六月居庸關馬蹴石子流彈丸曉渡灤河水水渾不見底中有三尺鯉素書不成字似疑戒我慎出入五侯之鯖過

客止羹覆手爛將奈何仰視流光去如矢行路大難歸樵空山或言山有虎豹  
嶺有榛菅歸漁于河河有蛟鼉去將隨波舊家汜渠溝已塞錢塘煙蕪歸不得  
敬亭白雲何離離二仙霞衣坐翠微手持紫玉簫和以丹桂辭大言泠泠小言  
纍纍勸子勿爲道途苦幽蘭深谷不當戶空青滿巖玉流乳手繪朝元之圖萬  
神舞

秋江釣月圖歌

南山舞空趨朔鸞北山人立如啼猿長流東來貫其腹謂是浙水屈曲萬丈之  
上源大魚奔騰鰭鬣焦小魚委靡隨江潮中有白玉蟾落落五采凝不消人言  
此蟾在天主陰魄淪沒何爲水中宅籟籟千尺綸蟾永不受吞廣寒高居凌紫  
清日逐烏御不得停愛此江水碧倒空浴影潛金精感君纏綿如有素瞬息還  
須上天去君不聞任公子東海投竿非小智又不聞嚴先生羊裘古瀨成高名  
君家慈母占畢逋百尺樓觀端可居黃金之鈎不復理明月年年在秋水

二老歌

王景先省即幼孤祖母及  
其母鞠之今迎養京師

烏啼風滿窗機鳴月當房辛勤三十年護此玉雪郎大母呼孫牀下讀阿嬈烹  
雞炊黍熟黍熟不敢嘗命兒奉姑旁姑言春在長安枝東風滿林深折之一折  
不得語再折春臙臙白雲何相隨下馬忽在戶驅馬還家上堂拜婦姑繡衫錦  
爲帶長安之花果如斗不辭看花飲春酒

三馬歌

東坡三馬贊本

羌水渾蜂解屯瑞至人率獸尊參以陳仰天門龍爲鱗炳虎文髯悍獮效伏馴  
鑿鑿駢馳道遵帝乘虬相攀雲逝無留返崑崙

廬陵劉老人百一歌

昔聞寧皇嘉定時平淮如掌糧如坻襄陽高屯十萬卒武昌金埒饒軍資西蜀  
環山堆錦繡滔滔南紀喉襟首峨眉積雪不動塵玉壘浮雲古今宙當年行都  
號全盛翠箔珠簾爭鬪勝西湖不識烽臺愁北關已絕強鄰聘寶慶天子來自  
外郎朝諸侯土疆日窄邊庭憂大帥偃蹇藩鎮侔小壘椎剝租瘢稠春城絃管  
暗煙雨四十一年變滅同浮漚咸淳太阿已倒持銅山之賊專宮帷樓危金谷

山鬼泣舸走白浪江神悲老人年周一甲子至元大帝車書合文軌每話承平  
如夢中萬事東風過馬耳只今行歲一百一坐閱天地同昨日秭歸聲苦紅葉  
翻邯鄲睡熟黃梁失門前手種青桐百尺長笑指截取諧宮商少君荒唐方朔  
誕不如老人親見深谷爲高岸我孫之孫爲玄孫翔鸞峙鵠高下飛集駢清門  
憑公欲補先朝事濡毫更作長生記

月鑑歌

騰騰玉兔光爬沙人言受日爲精華又言蟾蜍老不死側身躍入廣寒裏信知  
七寶合無跡借取山河成戲劇衆人望月見盈虧君今以月爲準式我聞初生  
時纍纍星爛不敢隨亦如男子墮地在文綵獨抱靜性無邪敬亭亭三五超象  
緯雲從于龍魚有水君臣得志何慷慨千古消沈竟相似須臾寒光海中匿山  
鬼悲吟虎狼藉華亭聽鶴流年空北海牧羊深雪積我觀帝城之月如玉輪團  
圓的的無纖塵中有隱默士範月爲鑑驚都人大言穿楊葉小言貫蟻肝太虛  
氤氳眇窮髮引酒高坐歌闌干



玉署鼈峯歌

答伯庸

女媧五色餘刀圭化爲蓬萊東海之虹蜺神君方瞳怒凝睇不如百鍊積鐵永  
從西方奎日有三足烏其光映顧菟海有三足鼈神山簸靈濤吐吞出沒無定  
時一叱使之來玉墀大承虛皇小挾銀漢黼黻帝裳追琢廟瓚森嚴曩屬鎮帝  
署百鬼卻走不敢侮其或敢侮怒絕其緒粲若珊瑚枝煜煜三秀姿文理密察  
儼素樸孚尹旁達藏玄機我昔坐其側耳冷心彷徨經旬臥向壁夜夢天孫手  
授雲錦交龍章漆書誥盤傳古昔中有寶珠杳無跡散之六合捲如席視之不  
見聽以息元氣氤氳龍馬興文茲石點首詔爾小臣慶非煙霧出如絲綸矢心  
濡筆靡有數萬古作式永無極

秋風歌

答子貞

七月霜清鴈南起美人亭亭望秋水鼈峯石畔金蓮彫襪被中庭候行止至治  
丞相歌堯民矢心前榻詞如雲平原黃低翠交舞寶檣肅肅方調辛巍峨虛皇  
傳令速萬姓樂康真景福使臣覘言黍未熟八十一車馬停足

東門行

神皇揮戈度黑河四廂捧日肩相摩金袍珠縈帽七寶剖符帶礪功難磨年年  
舞馬魚麗列宴罷玉帳經南坡巖更傳警夜氣肅貔貅千列環象駝華蓋西傾  
星散雪殿前蘭膏猶未滅千金七首肘腋生拉脅摧胷慘凝血平明羣兇坐周  
廬傳旨東西騎交送棄馬之邦身被繫執簡以朝筆猶舌煌煌厚恩浹肌髓悲  
淚填顴痛天裂金繒盈車內府竭虎視眈眈終一啞

廬陵海月道人歌

飄飄白玉丸空明歷落行雲端世人不信之謂是太古圓缺相循環吾欲與子  
窮端倪一葦巨浸無東西金精貫珠宮倒影流銀泥飢蟾飲水不入吻五色吞  
吐成虹蜺迺知山嶽積培塿巧遮世目如以手茫茫水空輪載地行無垠置身  
浩蕩外光景常如新吳剛持斧不得休沃焦日夜無停流紛紛榮辱可奈何仰  
天一笑君當歌

聯句

東湖

舊學蕪三史新居隘一廛煎熬魚煦轍奔竄鳥驚弦擬整登山屐長伯須乘破浪

船出關塵已遠平德過埭意爭先歸舶攢桅聚長伯浮梁斷鎖懸潮渾江葑沒平德滕

破岸藤纏戍柵依樟密長伯官堤砌石平機閒荃喚織平德砧響鴈傳箋乍靜喧煩

耳長伯猶欣輾轉眠鷓橋華屋廢平德鵝匯曲河連稻實閑農具長伯嵯巖絕竈煙急

裝紅蔽膝平德辮髮黑垂肩估客編文具長伯村家緯木棉生涯疲剝割平德世路窘

迤邐龕室休行客長伯郵亭數逝川鞞鷹圍獵罷平德聯騎縱遊旋路轉分支港長伯

川明幻別天鄴城花已暗平德雨水恨空傳數堠搜唐刻長伯題詩紀宋編會堂夫

子像平德汲井隱居泉海眼藏龍窟長伯山心射鹿田水鳴知棹急平德岸走訝途遷

隱見崗巒近長伯低昂橘柚鮮青山猶五里平德綠樹已千年歸犢如雲擁長伯閒花

似火然苧裳遊女淨平德蘆管野伶妍繫纜披團氅長伯循溪捨竹復徑香幽菊傲

平德土薄假山偏燈火精廬古長伯衣冠故物全登門論子姓平德對坐敘姻聯金魄

篩窗影長伯丹砂養井淵螢飛光熠熠平德鶴唳翼涓涓斗室橫烏几長伯方床藉素

氈魂清時入夢平德意得竟忘筌過墓成局戶長伯遵湖復扣舷滄州迷秀麥平德真

隱拱朱椽碧洞諸天杳長伯蒼珉帝畫鑄梯危頻縮武平德像寂且檠拳紫府商霖

歇長伯丹書漢澤宣銅鋪苔暗蝕平德經度燕新穿倦鳥辭枯柳長伯遊龜戴旱蓮古

奩開激灑平德斜縠縞漪漣淤塞艾排劍長伯洲乾蓼糝鈿官徵都尉粟平德漁納水

衡錢王絕山靈泣長伯祠荒野老憐紙旗鄰社鬧平德草广曲河填此去真聊爾長伯

斯行信偶然柏幽藏翹翹平德潭黑哀蜿蜒雅興呦呦鹿長伯勞生跼跼鸞攬芳真

啗蔗平德寫絕擬和鉛轍跡蕪菁翳長伯麻菴泉耳緣貞娥鬱龍虎平德胄相紹貂蟬

宰木分神隧長伯思亭列石筵風霜翁仲老平德香火釋迦專楚些招歸魄長伯王官

慨昔賢拜峯誰控勒平德篆水自書玄屈曲東西路長伯縱橫南北阡繁華眸轉電

得失口垂涎絮酒悲宗老長伯囊經想地仙房温連梵唄平德市近接腥膻破露

生衣溼長伯登坡弱足胼臥牛遺扁暗平德眠鹿繪容虔金刹從茲訪長伯塵纓合少

蠲伐山靈運躁平德衝雪子猷顛檜暖蜂偷蜜長伯蘆寒鳥啄綿蟹稀螯數百平德樵

夥斧論千淡日收人影長伯空嵐漲土埏蒲葵遮望眼平德繭紙論吟篇除道家僮

懶伯偷程地主僂蟻封徒曲折平德駒隙漫拘攣碎石行行直長伯脩篁个个圓深

藁驚雉翠平德夾徑聳楠榭濯錦芙蓉艷長伯飄香桂子駢雕楹回復道平德斜閣布

陶磚刻畫功難盡長伯暈飛勢欲翩奉常陳劍履平德尙服錫紘縱憶鮫人網長伯

帷凝罽圖旃妖姝汗粉頰平德土偶聳高顙祛石當時力長伯臨淵昔日權只今留

黑業平德何處覓幽禪燕領風雲會長伯龜趺日月纏蛛窠緣袞服平德鼠跡上朱籩

累僕供朝沃長伯因僧進午饗佳城蹲五鳳平德素業廢三鱸勝已窮蘭若長伯名猶

慕僿佺臺空霞珮冷平德殿寂羽幢薦觀主何年住長伯真宮永世鍵畫梁誰復葺

平德美蔭久頻朶木已非真李長伯僧宜賤壽錢悲來雲冪冪平德恨極水潺潺重嶺

藏椒屋長伯斜暉指蕙楊暫歸心未穩平德欲去眼空眩憶昔窮誅闢長伯如今猛棄

捐慈山名轉赫平德困塙恥誰湔積翠林霏悄長伯流波海月娟遠鐘催宿鳥平德橫

笛掛烏犍拄笏風騷長伯攜壺主僕牽情懷同黍醴平德臭味比香荃圓澤休論

舊長伯華胥復記前乳彪號澗側平德哀狄獻雲巔悖族盤殮盛長伯通家笑語闐鵲

鵲歸槩熟平德胙臚逆風沿濟勝應難促長伯臨流且賦遄鳴夷歌逝矣平德漁父卜

終焉紫槿遮籬角長伯丹楓壓廟堦鍊形金骨化平德團礎土砂堅破屋啼山鬼長伯

荒碑立老鷓歲時羞野賽平德水旱禱靈箏西帝澄金字長伯東湖鑄玉璿涼颺舟

泛泛平德晴日草芊芊射鴨縈長弋長伯義魚擊短鋌酒廬橫矮甕平德屠几斫肥脍

街市僧袍麗長伯招虛販鼓鬻登臨難婉戀平德想像費平銓更欲南窺海長伯誰能

北跨燕同心雙繭緒平德徇俗走珠蟻朗鑒詞聯寫長伯玄談茗更煎翺翔誠放浪

匍匐類狂屨已乏凌雲句長伯時思縮項編還家如夢寐平德共點曉霞邊長伯

九月望日送姊歸余氏先塋之廬登其高祖少師墓相傳謂外高祖忠定

王所相余氏之興北於此支壘為尚書公墓亦為佳兆十六日早發遵山

行一清里拜外舅之考待制公守墓僧畏祇迎閉關叩之終無人聲山勢

左行清興未已借余庵舟過東湖上外會祖忠宣公滄洲堂故基悽惋久

之舟上埭予與德平行至五祖堂觀所建寺後有洞像補陀示相捨舟

登葉夫人八行太師墓又上五祖堂觀所建寺後有洞像補陀示相捨舟

永州几筵行久殊為疲勞是夕德平抱兒相示眉宇廣予許以永大十

七日平明過種德拜正獻公墓讀楊文元公碑庵僧洒然非鄭氏庵比是

日德平攜壺同庵僧指領遊大慈山有僧年七十餘能道嘉定紹定間

事示忠宣公所製滄洲堂上梁文益重遠想拜忠獻王墓歸復宿鹿野嚴

君命以十八日歸滄洲堂上梁文益重遠想拜忠獻王墓歸復宿鹿野嚴

二十韻繁華感慨悉紀于詩詞雖不工然二親翁病瘡復留宿詩成凡百

好遊者用識于後云



遠遊

海鵬跨南雲一去挾浩蕩宛駒踏北雪絕足追罔象宵征車載脂伯明發燈在

幌行邁念悄悄離愁懷養養違吳始接浙德過越類指掌虹網結遐思羯鼓促

新響觴至不復辭伯駕逸誰能仿明堂企棟梁武庫輸篠簜氣合芝蘭芬德學

媿蓬麻長大施朱弦清小薦金莖沆雲間鶴孤唳伯天外鴻橫上曉舲斷層冰

午店憩平壤追攀瞰煙濤德涉歷走塵鞅長淮橋蟠螭薄霧裘驢駟風臺牛一

鳴日觀雞三唱團桑沃如蓋伯宿草亂若禿青帘客沽酒素鬣漁收網心歡沂

泗流眼豁恆岱爽追程騎侵星勸耕農植杖俗厚喜豐登德氣俠存慨慷伊河

既東流維斗復北仰誰云風土殊殆覺宇宙廣骨聳終超騰神清何懼况鈞天

夢非真伯廣寒步空想銖衣入閭闔芥粒視圮垠千官紫府榮九奏彤庭昶摛

文翦金炬德展采蒨天仗清都踰咫尺弱水漫方丈絳旂雲霧開寶扇日月晃

仁聲被八表伯德意蘇羣枉泥檢極封崇芬苾巖胎響瑞氣藹重重泰階瞻兩

兩駝峯出天廚裏躡錫中帑鳴珂接俊彥德正笏嫉偏黨德人笑採芝逋客棄

拾橡茅拔要有方矢來本無嚮湘纍但瑰詞伯長越相僅金像遭讒氣徒憤得計

身何往豈如及承平相與窮昭朗君行步飄飄我滯心悒快輕霜著衣帽微霰

點草莽離歌起蒹葭平德古製出盆盎先登匪十獲後至激孤艇城南燈火深塞

北音書咍東風漸披拂臘水初滉漾詩成愈加險酒盡未為彊雙眸秋水烟累

語春波盪經行度崎危伯長交友希個儻羈遊棄楚荒遠客憐齊儉光陰尺璧重

事業千金賞平德行還鴈塔題復覩鴻都榜時來戒步窘事至勿技癢脂韋本凡

近鐵石乃忠讜詞林納疵美書田課荒穰列仙會儒癯羣仕趨吏阻陸生彊咿

憂陶令終骭麟貞心百壬避正色上帝享徒為捧心施莫學畫眉啟功名要無

心造物端有相行行遂初志作事記疇曩

望洞庭山

海嶽雄前武乾坤入壯懷地臨區澤左平德洞接蜀山涯玄甲呈神禹伯長靈鼉琢

女媧岫橫青一髮平德水引玉三義鴈翅連雲暝伯長雞聲帶雨啣輕煙滋土脈平德

澍霧潤蔬荻橘熟金分顆伯長鱸肥玉饌鮭稻田碁布局平德草舍篆書齋塔正狂

瀾轉伯圩增古岸差畫船誰白傅德香徑獨吳娃伏翼疑銀乳伯游鳧訝翠鞵

苑存麋鹿過德石老鬼神羈野火分星位伯剛風直帝街浪高驚接漢德天闊

欲吞淮鐘遠春聲隔伯歌長艣韻諧靜依村社樸德閒厭市塵哇往事滄浪古

伯輕裝笠澤佳鴟夷奇策遠德季子宿情乖鈿壁銷朱戶伯香風墮綠槐臥遊

包景象德目送樂形骸尙憶禾生蟻伯誰憐竈產鼃江湖終漫浪德歲月敢安

排語盡情如客伯杯深醉近俳黑頭宜紫闥德白眼笑青綈門掩雲生室伯庭

虛葉響階墨花浮鴈字德燈粟綴蟲釵急吹鳴笙籟伯同雲屑豆稽行行從此

地德去去勉吾儕戀聳王良御伯帆凌博望查會須攀絕境岸幘訪丹崖

秋雪伯九月十四日  
長伯庸

白帝欲返馭玄神已先驅南山黯遐睇西館阻清斂刻雲環珮雜翦水瓊瑰敷

金英受剛絜丹桂遭模塗高標變鬢髮爽氣通微軀羣陰孤陽債積素五采腴

路脩天鵝疑穴履野兔呼蟬猶抱殘槐鴈仍驚折蘆澆漾露莖溜空清冰柱酥

或云勢已盡又言理非殊先時明堂嚴薄刑葶收誅浮華敵春澌斂實侔冬輸

慘立各動色沈思儼徐趨鴻鈞轉橐籥緹室潛葭萃觀物昧休徵永歌啓貞符

又九月十五日作  
德平伯長繼學

金神縮兌澤水妃表玄英西郊散冰粟北戶垂株楫三登發重瑞六莖凌孤清  
白藏縞衣舞顛氣霓裳呈楚客迷望眼羌戎候軍聲桂粉靈杵飛穀精露囊感  
降霜鄒子憤停日陽侯爭澄霄鶴失頂空江鷺搖晴菊貞返素朴木落超空明  
鏗鏘商籟諧大小藍璞成薔花賸壟畝梅藥光檐楹初疑蚊蚋集漸覺鵝鸕迎  
漢盤結夜瀼韓堂滅宵繁陽和趣報社嚴凝儼書正掩袂青女避沾巾素靈驚  
擊鷹眩莽蒼樹羽登崢嶸長楊散旃屋五纛增門閤絮團柳殘葉鹽裹荷留莖  
鉛飄孀娥匣旄落少昊旌井梧炫銀牀庭櫻轉珠纓萬入西帝遊六變坤母寧  
初驚遽然至忽訝乃爾輕單衣亟搗素黃裳倏飄瓊陶姬卻帳暖唐皇咽簫橫  
昊天有正命殺氣何橫行沈沈宸居肅兩兩台階平朔吹偶先集澤雷久藏鳴  
碩果理固在飛葭澹無營

槍竿嶺

伯生伯  
長伯庸

有嶺名槍竿其上若棧閣白雲亂石齒青峯轉帘脚積冰太古陰出礦無底壑  
馬飲沆瀣泉鷹盪扶搖幕轍跡委垂紳人聲發虛橐烏飛接鳥背羽沒疑虎躡  
霧松秋髮長霜果春頰薄升樵不知疲獨往端有愕兢兢矛頭浙扞扞井口索  
凝睇見日觀引手探月廓南下眇塵海北廣絡沙漠金橋羣仙迎玉幢百神鑿  
禽鳴蜀帝魂鐵鑄石郎錯鈎鈐挂闌干攙搶斂鋒鏑屬車建前旄馳道徇嚴柝  
載筆三人行弭節半途卻

送曾編修

伯長  
繼學

奇鶴慕南雲俊鶻欣北雪行藏龜左顧去住坂九折纂書墨兵從擬制銅史挈  
佩委松籟回冠峨星光徹塲花窺日輪井藻旋風鐵歸思紅葉高家憂紫荆裂  
晨裝發五兩夕祖謝駟馱沙明石痕瘦川遠桅影列吳歌導鷗舞楚製慘鶉結  
汀葭青女臨岸橘黃人揭組練危瀑懸簫聲古灘咽詩箋江神幻目送山君別  
烟烟雁集洲挺挺鸛鳴垤賈颿魚貫直僧屐驚飛滅前坡指迎帽舊墓拜表碣

明知紹世譜詎肯逐宦轍兒孤文襁昏女乳粉鈿湮深思振鷁原後胤超鳳穴

過都塊非歷去魯浙豈接歌驪念睽違瞻蟾數盈缺

李成古木

層陰舞玄蛟積溜落銀繭迸空太古枝

長伯

側石千歲蘚寒柯紐交樛霜旂釋餘

泣

繼學

俯憐巖壑幽仰矚雲霞淺雄姿虎當岵鍛翮鶴立巘長身屈迴紋曲蓋表

繆篆矯矯卻岱封昂昂陋桐翦初疑居移鄙漸覺坐閱鮮靈光魯國歸屈軼虞  
廷彥蔽牛我當容化羊君莫辨山糴養洸沐窗霧勤澡鬣直非龍髯觸勢若鹿  
角偃瀟騷閱馳颺懍懍集微霰玄黃馬師遺丹青犧尊覩采苓乃夷猶臥雪何  
輾轉

清容居士集卷第八



清容居士集卷第九

元 袁 桷 撰

律詩五

次韻善之雜興七首

習隱漸成癖  
苔光綠映扉  
避名常好好  
絕俗任非非  
日落長鑱柄  
天寒白苧衣  
南鵬五月息  
戢翼笑羣飛

萬事不滿笑  
書林盡歲娛  
未須夸得意  
底用哭窮途  
細雨看移竹  
秋風學繪鱸  
百年真急景  
醉入壁間壺

昔日登臨地  
狂歌祇自求  
漢宮空有恨  
吳女不知愁  
雲葉寒沙霽  
江花古岸秋  
何人持鐵板  
敲徹舊邊樓

學道常無寐  
披衣聽曉笳  
精勤慕柏大  
詭幻笑欒巴  
丹熟抽金汞  
窗明鍊玉沙  
微陽端有候  
一點應吹葭

善之近學參同契故戲及之

臥遊元不惡  
佳處絕榮枯  
雲憶東西寺  
山看大小孤  
行年須白社  
失意付黃墟

何事遼東鶴空悲景物殊

鄧子清如竹蕭蕭澹世情下帷鄰草色倚杖愛松聲嗜癖成書買身窮付筆耕  
乘槎空有約何日海邊城

書聲連古巷疑是白雲廬吟苦眠料理塵深靜破除詞華輕大曆風雅近黃初  
顧我相知舊艱難愧不如

月黑

月黑斗杓轉昏昏古柳壕干擷寒戍響窅堵亂烏號風定歸潮急門深落葉高  
向來江上意無語獨蕭騷

次韻題林隱

移家鄰縣去住久不知年花擁檐前樹泉歸澗下田丹芽承露浴石乳拾松煎  
擬欲題新竹才疎愧惠連

次韻上官伯圭夜坐觀梅二首

愛酒嫌劇飲天寒但欲眠烏啼千樹外雁過一燈前霜角悲涼調風幡自在禪

平生江海意袖手送殘年  
江梅元楚楚冰雪總相宜肯佐金樽舞寧辭玉笛吹天心元自正地脈本無私  
不盡關山意巡檐與賦詩

題柯自牧救荒記

曾聞於越地千里草青青比屋呼庚癸連年厄丙丁已傳青社記不用峴山銘  
近說天台宅新成太祝廳

壽高舜元父二首

喜見黃鐘月重推絳縣年雪窗温鼎火春甕養壺天朝市成真隱階庭擁壽仙  
時吟五字律獨立晚風前

玩易喜心清年高見太平杖扶靈壽穩松削養和輕夜月前朝事春風九老盟  
初筵漸後至立雪捧深觥

打灘

老石太古色遊魚新水姿輕冰養流永急瀑散飛碁角力誰爲挽臨流亦自移

南來多此意北望莫相疑

春陰

寂寂春陰半南來未識花故鄉憶寒食細雨摘新茶物色供詩句風沙入鬢華  
山林元未改客路獨烏紗

懷城南諸友二首

春至長爲客愁多始憶君風程江北路水驛海東雲杜宇深深怨醪醲淡淡醲  
行藏曾共數不是故離羣

養性深辭酒全交淺作書寧知故人厚自愧後生疎春入黃河道雲分碧鳥居  
江湖從浩蕩不敢愛吾廬

舟中雜書五首

野色連雲白春聲引樹清遊魚新浪急歸鳥片帆輕曉夢二千里風餐第幾程  
萍蓬元未穩徙倚問天明  
挂席疎星外停舟獨柳邊團團風始陣帖帖月初弦隴曲沙成雪吳歌水拍天

行藏有如此把卷獨悠然  
春睡元無著鄉心比酒釀  
飛花空有意小雨不成容  
獨樹疑新堠羣鴉似亂峯  
艱難憐浩蕩散髮遂初慵

河落渾無底飄零總客塵  
春洲蘆雁少曉戶柘蠶勻  
京洛饒豐稔江湖樂賤貧  
低徊吾不恨應有故山筠

桑柘斜陽道天然錦繡機  
雲容催溽暑花片憶春霏  
水落新魚瘦風清宿麥肥  
歸程時屈指重午試生衣

淮浦

淮水奔如箭舟維岸屢移  
斷岡封馬鬣落雁陣魚麗  
白葦前朝界青帘古戍基  
亂離今已矣風物漸熙熙

立春日宿大清口舟中見新月二鼓雪作

春月如佳士翩翩欲上船  
相逢疑昨日一別又新年  
水鏡心胸朗空輪體質全  
更深飛雪急直與鬪清妍

次韻陳剛中待制初秋二首

碧樹晚雲餘秋聲入客廬知公吟蟋蟀勸我憶鱸魚宦味元無著鄉心得未疎  
清塵滿雙鬢蕭瑟不禁梳

岸幘倚書楹寒砧徹四城馬歸人獨語雁過月初生寂寂候蟲急淒淒落葉清  
客懷誰與共搔首見參橫

送牟元通歸瀘州

西州人物論翁季擅清門已暗金牛路猶傳鐵騎孫巴江雲不盡蜀嶺雪空存  
邂逅衣冠聚艱難得共論

夜夢作詩覺因足後韻

薄酒薄於水濃山濃似春梁間雙語燕天外獨歸人細柳千重緒飛花一寸塵  
碧窗初睡醒新月寫清真

淮陰大風

極目虛無裏飄飄萬馬馳飛蓬旋橐籥虛谷應填篋春樹元無著晴雲復自持



倚舟沙際穩歸雁得相隨

題温州太守德政詩後

海郡炎歊重涼風起素秋飛蝗分界去鳴鵠下陂遊白布官租減黃甘雅詠酬  
兒童多好語竹馬擁君留

次韻馬伯庸春思兼簡繼學二首

洛花千萬朵一一為君開粟暈排金縷酥凝爛玉杯美人乘馬至仙子抱琴來  
莫學飛紅似隨風喚不迴

行窩春匝匝下榻望君來雙玉矜嬌思聯鑣騁逸才題詩紅袖擁傳詔錦袍迴  
羞殺高眠者楊花滿綠苔

送秦巖卿從事出宰北平縣

高秋右北平出宰樂時清白水前朝界黃雲舊塞城彈琴看雁過束帶候雞鳴  
不盡平蕪際題詩倚馬成

黃河口 徐州城西北隅與黃樓相衝今從此南流

河落流沙駛茫茫禹甸周昔聞傳北載今已絕東流俊鷗辭高下輕鷗擅去留  
百年文采盡日落認黃樓

徐中丞母八十

謝庭森玉樹漢闕賜金花懿德傳家盛耆年舉世誇晴萱當檻直冬筍隔籬斜  
拭目諸孫秀翩翩佩紫緇

送張榮澤

斂板滎陽縣栽花接早春水新魚子散雪釋馬蹄勻政可箋河伯何須詠洛神  
桑田今幾許除籍補疲民

贈瑛上人住洞林

托鉢千巖裏松花凍未開哀猿依講席飢鳥下生臺潭影留雲定鐘聲送月回  
山中太古雪爲寄一瓢來

送周南翁集賢南歸省墓

搖曳十洲仙來尋楚尾船金花榮故里石筍表新阡江橘團霜重冰魚鱠雪鮮

塔前雙玉好行賦鹿鳴篇

潞公判永興遊嵩之詩見於翰墨然卒與右軍之遊汶大率相類名爲造物所忌豈虛語哉今見其孫璋甫佐西省甘棠遺思至是殆將見之渭水落葉盡往來餘碧鷗龍門七十里雁塔一千秋弔古麒麟塚衝風驢蹏裘寒蕪明滅處遮馬見君留

劉氏集慶堂

華構出層林春浮院宇深小桃分雜佩新燕掠鳴琴石乳千年潤松花百尺陰紫皇方問道那許遂歸心

送蘇子寧和林郎中二首

貂帽護寒沙冰天閱歲華斷溪駝聽水密雪犬行車盡難尋雁春深未識花昔人奇絕處八月解乘槎

往歲經遊地寒蕪碧燐深雲開山後陣水咽隴頭吟雪白氈房重天青羽檄沈重華新雨露悲喜候車音

蘇子寧北行詩二首

出塞黃雲盡經春白雪多高樓閒鼓角絕域靜干戈風急盤鵬嶺冰深飲馬河  
征鞍遲明發揮手渭城歌

去去居庸道關山冬氣深雪天孤帳宿寒月一笳吟石堞棲鴉穩沙場過雁沈  
粉闥多暇日歸騎有佳音

吳閒閒病起二首

好客頻來往閒雲管送迎花香清病骨松籟答書聲身世三生夢乾坤萬古情  
故園多蕨筍歸興繞江城

客散庭如水春深日似年閒心觀宇宙浮世閱風煙詩句吟難穩蒲團坐欲穿  
一聲松外鶴此意共悠然

題蔚州郭氏永寧亭

華亭絕市囂山崦映岩嶢落葉燃茶鼎長松挂酒瓢天低雲欲下春盡雪初消  
歲晚無王事前村看射鵰

次韻馬伯庸題凌波仙圖

玉衣朝岱日寶瑟寫湘雲宛轉鸞歸憶參差雁過聞石痕生左角松影印迴紋  
倚竹憐雙泣摛蘭憫自焚停驂沙磧近指點認昭君

伯庸以詩見屬次韻二首

學古陳言少官清雅詠多珠玕明玉海寶鑑挹金波易賴韋編定書疑汗簡訛  
斯文今有託爲我補嘉禾

聽君人物論閱世似難多學禮師倉海傳家繼伏波看山窮北戒惜日愛南訛  
彩鳳非無食瓊山自有禾

高掾祖父八十

心跡混漁樵門深絕市囂花前歌舊曲燈下話先朝白髮書千卷朱顏酒一瓢  
有孫遊玉署從此樂逍遙

長春道士禱雨有應

清夜轉崑崙天雷卓午聞平林千樹響古澗百泉分門靜堆黃葉山空聳白雲

神功滿禾黍尸坐答鑪熏

次韻馬御史題漢州喻氏多勝亭

花壓金橋重春風第一州江喧朝灌口雲擁護遨頭雁落沙中渚鶻啼竹外洲

使君燈火地爲我倚高樓

鶴山年少時守漢州元夕張燈金雁橋斷

次韻伯庸過天寶宮

松暝碧雲深鶴歸人倦尋朝迴香滿室祠罷月盈襟白鳥分山影黃鸝轉樹陰  
小溪流不歇咽咽似鳴琴

送白誠之赴台州別駕

岩嶢巾子峯市近海潮通桂樹團雲濕松花帶露濃猿隨僧屐雨鷗送賈帆風  
盡道無王事持杯百過空

贈瞽者

尸坐包玄象虛窗萬籟沈聽泉知地脈候琯合天心風定馬蹄急霜清葉落深  
弄丸端可學從此罷鳴琴



送成公履守光州

淮樹連空碧，淮山徹底清。濯纓羞戀闕，佩印樂專城。曬網雲催泊，提壺雨勸耕。  
地偏王事簡，數雁寫琴聲。

寄開元奎律師五首

開元古壇主，盡日着袈裟。社主勤供菜，天神罷送花。蒲團黃葉護，香鼎白雲遮。  
終歲無王事，緡經到日斜。

開元古壇主，老至律精嚴。洗鉢魚遊水，開門鶴入簾。拾薪供茗具，滴露寫經籤。  
已悟如來意，看花不用拈。

開元古壇主，身世兩相忘。客至常扃戶，僧來不下牀。神光千里鶻，玄辨九秋霜。  
白葉渾消盡，蓮池任意香。

開元古壇主，瓦石化丹青。似住元非住，無營類有營。念珠金的磬，戒鉢鐵晶熒。  
我亦慚塵垢，清齋養性靈。

開元古壇主，幼歲已相聞。我竟飄京國，師方玩水雲。一官千日計，萬事五更分。

共約修蓮社空林洗垢空

鬢亂侍諸父拜雙峯祠堂未嘗敢有題詠二十年來接武于玉堂瀛洲

霜露之思缺然有覩近聞平石長老興廢補仆光紹前聞遂述舊懷為

六詩且申歎仰

沈沈大士閣千嶂萬夫降近樹青禽獨前松白鶴雙雲霞生几席星斗列軒窗

俛首京塵客生涯愧老龐

慚愧雙峯老光明兩足尊

新妝釋迦佛像

午窗鈎竹影凍筆點梅魂齋近烏啼樹禪迴

虎伏門春來有新雁勸我趣歸轅

經院辛勤日千金記始興

創寺時以賜金千兩經始今八十有四年

雨荒蟲蝕拱壁壞鼠緣藤舊觀

丹青復諸天錦繡承短簷增突兀會見出盧能

書來修選僧堂舊有術士言太高稗沙門滅其柱然清班亦不

聞有顯者故未及之

陰陰虞監宅

虞永興宅

鬱鬱越公祠掬水不入獻布金猶受疑流年翁仲守往事茲

葛知澗水流處曾傳玉帶垂

寒徹清泉底山童上水華定金非在井

羅暎羅尊者語傳昔有  
一女子墜釵其水遂定

煮米卻成沙洗

目能生電搜腸可當茶人持一月去此月落誰家

跏趺千樹暝彈指百花春道以東巖的詩於北澗新歸雲呈住相行籜掃空塵

靈鷲誰公論啼猿正惱人

次韻張希孟凝雲石十詠

我愛凝雲好神交萬化前碧窗圍蜃氣黑浪袞蛟涎化石知何代出山今幾年  
相從清思長寸穎起蒼煙

我愛凝雲好飛塵萬馬驅雄深麾將士峭直傲公孤斷足鼈分極摩牙虎負嵎  
何年化霖雨慎勿竟虛無

我愛凝雲好雍容諫諍姿虛中超混沌正色走窮奇潤物非無意成功自有時  
棲遲元未晚清坐愧神癡

我愛凝雲好氤氳萬象深鎮浮廊廟體閑靜雪霜心屈曲蜂房綴玲瓏蟻穴淫

玉京誇獨秀此日汗腰金

我愛凝雲好朝昏境不同金芽養靈谷鐵網起晴空月色古今正潮痕子午中  
點頭那有異吾欲問生公

我愛凝雲好神清湛欲留岷峨千古雪泰華一天秋獨鶴離羣皎層冰出澗幽  
無言有深抱山立正陽休

我愛凝雲好模糊老墨仙癡墓端食月渴驥欲奔泉守黑壺中日談玄洞裏天  
煙霞元自足塵世未爲賢

我愛凝雲好脩然一榻棲支機何物誕醒酒此君低香遠能爲霧泉深解作溪  
未須鄰綺角端可比夷齊

我愛凝雲好能歸萬古春遺簪三島客椎髻八蠻臣柏子添清供梅花寫舊真  
天心元不動東海任揚塵

我愛凝雲好蒼龍擘破飛振纓悲濁垢整珮謁清微歲月江翻浪冰霜玉韞暉  
黃塵今幾許且勿展書闥

樹重雲光溼峯寒曉氣清抱琴人欲往門暗客相迎凍雨生寒溜深雲倚怪藤  
蹇驢吟不得指點墨千層

淇綠堂

卜築荆溪下碧陰生晝涼軒昂丈人行瀟灑此君鄉月候緱山鶴雲催嶰谷凰  
衛風朝夕誦底用別詞章

寄砥長老

雙峯不受暑傑閣稱幽禪蕉葉綠雲扇藤花白雪氈見龍增澗水喜雁點江天  
笑我開平客于今第幾年

送李希白降香武當山

絕壁通靈籟天香簇寶華重明應龍馬習坎伏龜蛇度嶺金盤日穿雲玉佩霞  
道逢采苓叟應與論南華

送永新王東野還里

天際風花黑燈前鬢影蒼方刊肘後祕金散囊中裝某樹童年種茲丘晚歲藏

已忘朝野事飛鷺起鳴榔

輞川圖

詩中傳畫意畫裏見詩餘  
山色無還有雲光卷復舒  
前溪漁父宿舊宅梵王居  
千古風流在披圖儼起予

贈雪窗上人

少日觀滄海陰山恨未登  
飢餐太古雪渴飲萬年冰  
柳色迷官道鐘聲動客燈  
聞聞與見見問我一枝藤

直沽口

二水赴滄海客行殊未休  
漁舟維病鶴歸棹起輕鷗  
雨重雲光溼天低樹色浮  
京塵今已洗從此問菟裘

三月廿九日阻風馮家口

飄泊春風怒維舟古渡濱  
防堤堆馬鬣蹙浪捲龍鱗  
撇掠吞吳陣紛披障庾塵  
柳陰亭午轉人靜白鷗馴



次韻劉明叟

欲知行路苦孤雁促歸期矮屋燈昏際空林葉落時滄浪誰欸乃襤襪笑吟癡  
點檢韋囊裏珠璣總屬詩

壽閩承旨三十韻

寶曆書堯甲蒼杓指夏辰脩齡天保魯嘉瑞嶽生申人物中州正陶鈞淑氣淳  
舒晴翹孔翠墮地擢麒麟藻思傳髻綺蜚聲起搢紳文鋪崑玉鏤賦約楚蘭紉  
樂道車中聘談經席上珍飛牋油幕佐執簡柏臺賓黼黻開丹地絲綸演紫宸  
慶雲圖遠牒甘澤洗荒塵評論空餘子儀刑倚重臣昂昂霄漢表皎皎雪霜身  
滄海鷗忘慮長風驥絕倫名高諸彥避德盛後生親朗鑒中秋月天和太古春  
精忠言款款獎引語諄諄書葉題文債詩筒破酒巡筆翻金井凍詞吐露桃新  
格律常楊陋篇章鮑謝鄰辛勤憐我輩銓賞屬斯人南極呈黃道東皇挾絳輪  
霓旌紛旖旎香鼎秀氤氳果熟分金母丹成養谷神心澄眸轉碧光瑩頰浮銀  
物色歸青簡年華閱大椿小車花外影馴鶴竹間真賀履聯行整傳觴捧勸頻

疎閒看遠岫虛靜傲蒼筠往事雲舒卷流年肘屈伸長生端可學靈壽不須陳

次韻仲章過陳氏城南書隱十韻

矮屋參差倚平蕪黯淡看夢迴榆塞遠愁絕翠峯寒白髮游絲罨丹心古鏡蟠  
槐明金瑣碎菊鑄玉嶺屹憶月時看劍臨風復整冠鄉音憐過雁古調拂離鸞  
去矣歌招隱終焉樂考槃晚知交態薄老識宦途難口腹非真累毋煩饋一簞

入南城遇老醫言山陽舊事因成十六韻

邂逅山陽老相傳事已訛姦雄歸草莽天地入悲歌太守籌謀誤將軍禮數苛  
韃橐同下吏騶御失前珂洪認顏如此憑陵事若何比肩身肯辱卻立齒爭摩  
水捲寒雲甲風揮白日戈耳聞人作膾眼見血成河翕霍同么子倉皇類小皤  
官軍奔及馬婦女走乘驟自古儒冠忤難將杯酒和功成真草草先公在宥府論山陽事去  
國後維揚論功咸謂偶幸時至復峨峨漂母恩徒快中郎詠未磨荀羨為中郎將有北征詩遺屯迷鼈石  
鄧艾所築舊浴暗龍渦土沃村村麥湖深處處荷人生貴行樂何必問銅駝

壽致政王侍郎八十二韻

壽俊標周士儀刑望魯儒輞川饒詠賦璜水祕謀謨壯歲丰神整明時膺仕殊  
東曹誇鶻擊公府羨鸞趨審象三韓使含章四皓圖長身昂野鶴正色叱妖狐  
誓墓文何早傳家計豈迂鄉稱三老舊人說二難俱舍並分桃塢田開別芋區  
水邊時避飲月下屢嗔扶眼碧看山媚鬚銀映雪癯油車懸蹠躩野服綴襜褕  
社肉時相餽春醪不用沽綵衣新稚子椎髻古奚奴鼓擊深深舞茶烹緩緩呼  
花飛迷去路鳥下避行廚南極珠分瑞東泉斗借斟造朝看賜杖入里記垂弧  
翠柏根如石靈龜息自腴從今躋壽域底用詫康衢

壽牟獻之大理卿七十三韻

氣概岷山秀風神閬苑仙西州餘故老南國挺真賢瑞靄垂弧日人思衣繡年  
清門開耄慶綠籍紀齡延止息功參易虛心體合玄厖眉垂素手漆髮換華顛  
令歲七十眉間忽  
生兩毫髮重黑鳩杖何期賜牛車不待懸三鱣傳素緒一鶴記青氎粉社爭

爲壽蘭堦數擊鮮風驂追廣莫雲珮憶鈞天往事清霜木希音太古絃五更尊  
禮絕六老舊堂專所居正六  
老堂遺址杞菊調饗鼎丹砂養井泉慵書乞米帖羞辦買山

錢醉劇簪花舞遊疲枕石眠黃公終慕隱白傅且逃禪文物傳青史耆英入繪  
編弁山寒戢戢茗水響娟娟望海傾朝夕瞻星候次躔登龍身未武執雉意空  
傳偈仄徒多恨低違祇自纏窮鄉真坐井陋室強懷鉛夜月思延桂秋風學詠  
荃終然羞弱植復爾滯孤鸞問字甌空在傳經席未前牛衣期振拔馬磨費評  
詮冰柱垂青嶂蠙珠湛碧淵至言機已息妙技目無全凡質丹須換精誠溜合  
穿遡風輪善頌立雪冀敷宣

壽李承旨四十韻

寶曆開三禩瓊章集萬神蒼龍迴插子玉兔候交辰潞水丹騰渚壺關氣接旻  
道傳莘野正學比傅巖醇帝運昌文統師臣秉國鈞清宮高贊畫潛邸舊經綸  
意得超今古才雄異等倫春浮霞錯落秋映玉嶙峋三執中書柄重開大國眎  
黃鍾陽脈脈瑤圃霧氤氳仙鼎神膏祕宮壺掌露真恩釀錫麟脯味薄謝猩脣  
瞳碧光流漆顏紅色耀銀垂紳凝泰嶽設席陋平津手挈重華古心追貞觀新  
至人專上壽八表樂同仁非虎耆年並猶龍祖譜親息深忘蜨化機靜狎鷗馴

蕩蕩心無競，肫肫俗易淳。極知調鼎鍊，不惜汗車茵。竹帛千年事，桑麻萬里春。  
管商謀可鄙，房杜跡常遵。斟酌扶元氣，彌縫護國珍。倚風憐竹弱，聽雪喜松皴。  
玉署親裁詔，青蒲獨奉宸。蜀江移戍罷，浙土減租勻。榻淨唯烏几，堂虛且角巾。  
手揮廷下吏，目送幕中賓。習隱時思許，題詩尙憶秦。黍田溪溜溜，花塢澗鄰鄰。  
問俗停車緩，貪賢倒屣頻。藥囊儲赤箭，水鑑徹青蘋。滄海收毫末，空林絕隱淪。  
籍功文館定，約法論堂詢。出處關吾道，安危佩一身。政須陳蹇蹇，直與紀麟麟。  
績蕤慚班馬，抽才頌甫申。占天徒有管，望冶眇無垠。閱歲桃成實，知年海拂塵。  
扶疎慚小草，葱蒨託靈椿。

送文子方著作受交趾使于武昌長律二十韻

萬里蠻陬貢，清秋督使馳。乘車專述命，受幣聽陳辭。紫舌音聲狡，雕題聚族滋。  
玉門心愈遜，銅柱約難移。江漢尊南服，星辰拱太儀。趨庭輸齒革，授館列膏脂。  
私覲情鈎隱，公言理折疵。彈丸空有險，束矢定無疑。桂蠹消煩溽，龜審事宜。  
要荒工跌宕，保障慎羈縻。鸚鵡寒汀遠，蒹葭晚岸欹。壯遊詩句豁，古戍角聲悲。

月轟朱簾正山低翠浪欺班超空耿耿陸賈政怡怡楚水愁腸結衡峯望眼賒  
過門王事急去魯驛程遲緬想垂衣治深求備衰資大夫謀可利小客禮須持  
諭蜀徒煩檄平南漫擬碑佇看王會傳端假史臣爲

魯子輦御史分按遼陽作長律五十韻愛其精密予今歲亦扈蹕開平

因次其韻

象御天街正烏輪海觀昇省方秋戒慎扈蹕歲因仍石迸根駢拇山迴勢左肱  
塵深疑帽重霧密覺衣蒸午頓炊難熟食酒易勝解鞍心惘惘執轡念兢兢  
酪水分罌缶通薪算斗升皮毛均製服脂腠或然燈統幕迷高下烽臺閱廢興  
度關泉水咽出口月華澄狼戾官芻峙魚麗餽粟徵千房雲疊疊萬竈墨層層  
列帳排衣甲行營護棘矜旆旋環似翼鼓發去如繩斗北瞻紅棧雲西指白登  
草肥青穉稭松聳翠峻嶒積雪疑忘象搏風訝徙鵬屬車攢幄帳行殿儼茵憑  
白氎時逢賈朱衣定指僧翠旄逼華蓋金甕耀觚稜觀闕天經界儀臺象緯凭  
仗飛拳似虎鐵杖足如能竹帛司常煥丹青職貢增會朝珠帽蒺錫宴寶卮凝



陞立齊垂橐師行陋釋棚廣寒通月窟高爽寄涼檜上聖英資異丁年武德弘  
天戈中夜渡星檄百川承同軌嚴行夏明裡恥用鄣別州端首冀分器定先滕  
德啓無疆服光傳有道曾皇威宣絕漠陽澤散堅冰表正辰居所漸仁水集棚  
庭開下鳴鳳苑廢罷飛鷹舉逸尊加璧掄才鄙販繒鄧林搜八柱瀛海取三凌  
曲學慚繩祖孤聞賴得朋沈思雲外弋冥索澤中曾客議雞同鶴人疑驥聚蠅  
濡毫終有思執簡豈無懲謂可兼遐邇胡云立愛憎清芬蘭佩結芳薦蕙殼烝  
鴻筆吾誠忝韜軒子累乘共知心耿耿相對髮髻髻馬磨誰憐許龍門共企膺  
枚生詞過實揚子德徒稱盛化乾坤闢王綱日月恆麟符昭炳蔚豹霧駭超騰  
虛白難爲繪空青不受贈欲追千古筆爲付一枝藤

王趙公八十應制十韻

耆德膺熙洽皇風協泰和公明旁作穆帝念敘惟歌粉社新封土蓬壺舊隱窩  
黃公資輔翼白傅退婆娑望日靈龜息擎雲古柏柯精神霞炯炯儀觀玉峨峨  
設醴樽浮蟻兼珍釜錫駝擁牀爭置笏立馬會鳴珂服食丹藏井絲綸錦簇窠

永須依日月何必問煙蘿

壽開府承旨十韻

泰嶽舒紅日天門爛紫霞  
氤氳生宰輔磅礴贊亨嘉  
文武揚中外寬嚴接邇遐  
遊嵩雲擁馭度積雪飛沙  
畫戟車流水青編筆有花  
精神春不老器宇海無涯  
玉殿彌綸重金鑾密勿華  
傳宣花似斗錫宴棗如瓜  
上壽三千歲元勳第一家  
山河開賜履早晚聽宣麻

劉邢公九十應制十二韻

賜履光華闕延齡冠帝畿  
氤氳秋霽嶽菌蠹露凝芝  
六聖存遺老千官介壽祺  
傳宣鳩飾杖錫宴蟻浮卮  
餐玉銀鎔頰簪花翠壓眉  
灌陰機帖帖擊壤樂熙熙  
坐石雲生窟澆槐水溜池  
霜深風脫木冬暖凍消梨  
往事先朝夢多情舊日詞  
魯公方拜後鬻子定爲師  
用拙長年櫟虛心太古著  
成功全靖退樂道過期頤  
次韻伯庸畫松十韻

妙思通靈素玄陰接帝青  
抗顏躬蹇蹇蒙頂髮星星  
颯爽龍羞豢蕭疎鶴鍊形

壁虛生地籟斗近昇天經蝶夢春濤湧蟲疑曉日冥雲生停學候風入倚窗聽  
屈曲車連軫騰拏簏列庭戀鄉思海岱封爵鄙云亭月落孫生嘯天寒屈子醒  
雄姿輕虎豹浮跡陋鷗鷖

壽張希孟父郡侯八十二韻

古渭垂綸老康衢擊壤翁星輝騰處士天爵賁家公顥氣西郊肅祥雲北渚濃  
坐班鳩杖叟舞轉柘枝童壽骨英光聳厖眉厚德充九重恩誕錫三命偃彌躬  
麟紱開華旦龜齡擬少嵩簪花便廣穎植菊瑩方瞳鼎釜兼珍飫刀圭上藥融  
傳宣壺燦爛合宴珮青葱積慶先猷遠詒謀晚福豐靈椿培世範玉樹挺家風  
正色通天闕高懷納楚宮倚風看雁北就日見雲東君父恩彌重交遊論盡同  
竭誠心翼翼移孝思忉忉意壯追奔馬機忘數過鴻玄參揚子衍書比伏生工  
浩蕩漸摩澤昇平塊坳功定須超混沌何必問崆峒

王叔能侍丞相入見王繼學尚書序其事謹賦十二韻

行殿圍氈邸鑾輿擁翠簾重華方聖治上宰益勞謙臺閣推公幹蒿萊擢孝廉

官儀精考核選格絕停淹議禮心如轂探賢手自籤都曹清望重瑣闥雅才兼  
對榻褒嘉寵垂紳俯伏瞻傳宣桐酒錫拜命襲衣霑令節薰風細皇恩湛露厭  
事殊靈壽杖賜比水精鹽際遇喧朝野矜誇徹里閭遺臣思載筆往恨泣攀髯

清容居士集卷第九

此處為多行淡化的文字，內容難以辨認，可能為正文或序言。

清容居士集卷第十

元 袁 桷 撰

律詩 七言

廉右丞園號爲京城第一名花幾萬本右丞有詩次韻

閉戶春深詩崇侵卷簾新燕掠清陰亭亭梅月能消酒肅肅松風獨和琴新筍未容穿石徑落花時許補雲林主人妙手隨機轉萬本姚黃磨紫金

禊日與剛中待制至廉園閉門不內駐馬久之復次韻

雲鑲亭臺烟霧侵難將禊迹擬山陰花飛竹外疑紅袖水度松間自玉琴駐馬客迴迷遠路倚闌人在隔清林誰言洞口無消息一見應須直萬金

送孫道士歸杭

送雁南飛十五年朔風吹雪上華顛梨花的的疑蝴蝶燕子深深似杜鵑東野先生愁外句西湖處士夢中緣抱琴獨去知無奈一棹春江水拍天

次韻王寅甫侍讀蒞醮長春宮

飄飄笙鶴雨絲輕聽徹靈璫曲再成玉案香分花有影瑤塔松暝露無聲九枝  
燈裏開真景三素雲中賀太平莫怪錦袍衣袖冷還家從此羨長生  
蛻骨棱棱似鶴輕觚壇危處玉爲成天街正候三能色雲所疑呼萬歲聲氣篆  
通靈歸廓落心章祈歲報清平金穰上瑞吾皇意不用神芝朵朵生

題張宗魯編修詩集

雁蕩峯寒晝飲冰碧雲爲構玉爲棱已除白髮三千丈疑上瑤臺第幾層松頂  
露涼旋整鶴原頭火淨撇游鷹何人妙解清新句別盡風簷一寸燈

送李伯英秀才歸廬陵

黑頭徒步謁神州款款飛塵鬢已秋日暮競傳鸚鵡賦天寒誰解驢驩裘雁聲  
未歇砧聲續燈影初銷月影流可是親知留不得故園清興起滄洲

次韻答周秀才

湛湛玄雲起研山桃花爲色玉爲顏溟鵬水擊三千里天馬風生十二閑芳草  
春濃堪試筆長空秋盡獨憑闌松階翠影流如滴遲子攜書共往還



次韻成季灤陽見寄

客思如癡日似年，晚風投憤思悠然。  
看山不逐馬蹄去，得句時從雁足傳。  
紅綠芰荷秋岸岸，青黃蒲稗雨田田。  
尊鱸有興愁無奈，欲問渾河下水船。

次韻陳又新

登臺底用惜春菲，平楚微茫落照時。  
燒後斷碑遺鳥跡，耕餘殘壁隱蠶眉。  
泉分去路蕭蕭玉，山聳歸雲簇簇旗。  
駐馬應須更搔首，遠烟迴雁不勝詩。

西湖空濛圖

舊隱湖山筆底收，相從京洛意中游。  
昏昏車馬飛花雨，寂寂鍾魚落葉秋。  
千古登臨翻昨夢，百年歌舞漾清愁。  
何當化鶴看滄海，不用呼猿汲澗流。

次韻張秋泉益梅三首

萬里南來帶白雲，低徊猶作自由身。  
孤根齧雪疑無伴，冷蘂餐霞別有春。  
頗憶西湖頻入夢，不煩東井與生神。  
相看歲晚真清絕，疑是瑤臺第一人。

深明閣裏江南樹，老鶴翹翎似病身。  
紙屋藏雲團白雪，丹臺朝日補青春。  
蒼苔

有恨悲山鬼翠袖無言倚洛神回首空林歸未得淒涼相對獨關人  
華頂空餘萬疊雲獨將清影伴吟身虬枝欲挾窗前月驛信能通塞外春底用  
施鉛鄰越女從教翦水恣波神碧虛仙客清無奈留作新詩故惱人

次韻仲章游南城二首

瑤閣雲深野馬昏分明日月引天門峯迴九鎖疑無路水過三叉別有村頗怪  
鶯花春不負卻嫌雞黍約誰存山童閉戶茶烟暝客至從渠未許論  
側身千仞苦不早愛此春從天際浮北雪西山憐我瘦黃塵白日送君游翩翩  
目送雲中雁杳杳機忘海上鷗今古登臨總陳迹倚闌何事起清愁

贈王君佐

精神映日碧芙蓉直節昂昂衆不如十載長安心似水一官淮海食無魚少年  
已擬治安策晚歲肯爲封禪書聞道功名須皓首鐵冠簪髮莫嫌疎

送蕭立道歸天台

華頂雲寒人不到煩君爲上最高層天雞正叫三更日海鶴曾餐六月冰客路

微茫同脫木鄉情依約近歸僧還家莫作採芝叟背負青天傲大鵬

送李景山使交趾

萬里雲南把一麾日南重見使車馳思家不作玉門表得句擬題銅柱碑象譯  
舊傳周禮樂馬人遺俗漢威儀桃榔溪驛疑飛雪樹樹梅花九月時

九日書懷

烏帽衝塵鬢漸皤黃花慵插獨婆娑新霜去雁天機少落日歸雲雨意多拄笏  
看山真我事持螯把酒爲君歌登臺欲盡鄉關望一徑松陰長薜蘿

慰曾道士

積構層巔聳玉臺松花浮翠雪皚皚終然一笑騎鯨去可是長眠化蝶來身外  
乾坤憐納芥壺中日月隘浮盃何人欲問先天事隱几蒼髯換不迴

抵滄州先簡善之應奉

黃金臺上英賢滿白玉堂中步武新愧我清塵暗顏色羨君碧眼暎精神春風  
未信看花少年夜應知視草頻北望五雲開曉霽相思那得勝相親

送李彥謙赴西臺御史

百二山河驄馬游西風渭水思悠悠鶴翻古柏千年雪鷲擊平蕪九月秋挂笏  
漢陵尋玉雁解鞍蜀道問金牛官曹朱墨何時了一榻清吟是勝流

張虛靖園庵扁曰歸鶴次韻

招仙游館構亭亭萬疊松寒曉日青玉局講殘春換劫石臺丹在草通靈紅羊  
赤馬悲滄海白虎蒼龍儼大庭爲愛子喬笙鶴美月涼時許夜深聽

送華道士降香武當山

神君壽與玉皇同歲歲香傳第一峯龍虎使來紅日擁龜蛇靈在碧苔封萬年  
松子天風奏九節蒲根澗水春博士文工成故事石牀爲採玉芙蓉

送虞伯生降香還蜀省墓

玉雪祠官貂帽低笑乘飛燕上天梯寶幡繡重團金粟鈿合香巖印紫泥官饌  
每供千歲鹿驛程深聽五更雞流沙可是河源地搖首揚鞭更欲西

承相墳前雙闕摧泉聲隱隱柏崔嵬金牛已向秦中去銅馬空傳渭上來叢竹

兩留銀燭淚落花風颺楮錢灰百年華表塵千劫聞道曾孫始一回

再次韻

振衣千仞笑雲低捫歷星辰履劍梯度坂政須三尺箠入關應笑一丸泥神君  
祭重祠青馬墨客才工頌碧雞萬里遨頭端不負花開緩醉玉東西  
閣道新年舊石摧望鄉使客意冤冤犀牛坐見降王去杜宇聲隨望帝來三卯  
錄成魂有燐五丁神泣劫揚灰推釃欲作鄉鄰會揮手先催弩矢回

三次韻

觸石危藤壓路低哀猿送客上丹梯一百八盤雲亦雨二十四番花似泥解佩  
浮游憐野馬振衣亭育聽天雞拾遺已去武侯遠空戀祠堂與灑西  
時平弔古莫心摧去驛斜陽指馬冤曲曲松陰隨帽轉層層山影入杯來草玄  
有意池留墨觀象無心筋畫灰爲問丈人今在否青牛穿嶺日千回

送王繼學修撰馬伯庸應奉分院上都二首

玉京高處雪流脂連插雞翹綠鬢垂蹠躩有泥歌獨漉琵琶無夢說相思黑河

舊樂催填譜白海名花擬進詞羽獵上林俱罷賦卿雲何以報明時  
淺坡平疊積漫漫拂嶺青帘罨畫看氈屋起營羊腓熟土房催頓馬通乾桐官  
走驛傳金椀冰正分奩貯玉盤莫上鄉臺望南北白雲微處是槍竿

寄王儀伯太守

維揚太守文章伯故壘荒烟取次題逆浪風高淮白上寒沙雲落海青低極知  
后土花如雪不惜平山醉似泥跋馬使君官驛畔揚鞭卻在夕陽西

壽劉承旨

茲審齡開希有文潤太平玉杖造朝樂堯堦之化日銖衣拂石歌舜殿之  
薰風壽擁靈椿歡傳故梓敢陳善頌庸贊令辰

稜稜鶴髮映方瞳玉帶桓圭一品崇禁署清名行世久高門盛德與天通升堂  
衣並老萊子傲國詩傳衛武公共道榴花宜結實綠陰濃淡駐杯中

孟習卿都事母八十歸省關中其家四世科第祖十五當金亡時舉進

士終待制



鶴髮初開九九年東西雙鳳集庭前

乃兄官燉煌亦歸壽母

篋藏龍榜金花淡案捧鸞書

鈿軸鮮竹筍清甘宜夕饌萱花芳遠傲春妍風流文物關中舊點檢諸孫射策

編

送李元章宰陝縣

稅冕觚壇匹馬歸冥鴻斜日悟天機明時法律心常鄙小邑弦歌願豈違潁水  
初霜黃葉下華山新雨碧雲飛當今人物須公等行見鋒車入帝畿

次韻李伯宗苦熱

庭院無眠夜氣深繁星閃閃漏沈沈祝融煖火翻初劫姑射凝冰易舊心角枕  
雲蒸紋欲斷蠟燈烟暖淚難禁蕭騷忽作還家夢翠木扶疎萬竹森

次韻程士安睡鶴

疏翎慵受朔風侵谷口雲歸自在心蝶化不知人事改蟻酣空憶世塵深珠宮  
胎息天濤靜寶所神游斗柄沈何事驚烏繞林樹月殘衝曉議晴陰

次韻陳海陰

三月雪花飛作氍春風似欲駐新年夢當好處成烏有歌到狂時近自然村樹  
綠齊黃鳥界海山青盡白鷗天何人會得龐公意布領長披不上船

次韻院長退朝書懷兼送李元章廟令三首

踐阼篇陳夙致齋明良慶會叶榮懷南山豹聳文章潤嶰谷鳳鳴律呂諧黃閣  
規模深倚注金鑾人物費推排夜光照坐羣傾動誰道驪龍左耳乖

朝迴深坐碧雲齋無限家林入素懷整頓乾坤新禹貢翦裁冰雪舊齊諧舳棧  
望日紅蓮擁蹠躩看山玉筍排魚水政親那棄得白鷗相對莫相乖

會着蟬冠會宿齋陽春玉雪映澄懷黑頭瑞世須奇遇白眼論交自寡諧腰裏  
當堦身獨障有乘馬入廟門者叱出之舍桃薦廟手親排蕭蕭匹馬投山縣人事相摧似好

乖

題鰕齋

蒙蒙眇眇傲滄溟羞殺任公夢未醒寄館蠅鬚猶綺靡深藏黍粒獨清寧掌中  
旋舞憐飛燕案上能行笑巨靈惆悵九衢長劍客駢肩堂下慕遺腥

送東平程太守

秦嶽巖巖鄆水清分符投老得安榮百年禮樂維時舉比屋衣冠合旦評馬鬣  
舊封蒼檜老龍鱗古殿綠蕪平高唐路近羊生泣東望憑公爲寫情

送周南翁分刺池陽

柳亭松露十分甜秋浦天青雁拂簷黃葉滿庭君吏隱白頭掩卷我郎潛風催  
帆影迷紅蓼江送歌聲入畫簾惆悵九華金碧洞謫仙人遠月纖纖

次韻雙頭菊三首

袖舞西風大小垂駢頭容立傲霜姿步搖高擁車同入笑靨初鈿坐共移素質  
斷金疑並蒂閒情餐玉喜浮眉蓮池睡冷鴛鴦起似怨秋聲有恨離

碧雲低壓玉繩垂鸞鵠交翔表異姿白帝司秋金已肅黃人捧日馭初移藥宮  
罷講扶雙髻桂館霜餘卻十眉剩掃雕摻兒女態象中明兩見黃離

空庭雲盡露珠垂翠羽交分大雅姿氣服中黃心獨苦光浮大白眼爭移智瓊  
有約徒誇額京兆多情卻畫眉桃李爭妍真不遜故留雙玉伴支離

閣阜山青玉軒晦庵容齋諸賢觴詠之地虞伯生作記吳成季令賦詩  
江南琳館蕭閒地一一新文付集賢真誥總傳天外語禁經未數酒中仙步虛  
巖近琅玕響禮斗壇空薜荔緣諸老會文題詠絕□誰鳳觜續離弦

題揭曼碩詩卷

深湛妙思筆鋒收的的冥鴻楚岸秋直以紫芝招綺夏擬將白羽定曹劉松濤  
夜漲驚金谷花雨春濃爛錦洲此意徬徨人未識期君翫月上南樓

送衛大隱回錢塘

衛清叔  
曾孫

諤諤中丞骨已仙滄洲漁火起寒烟魏公賜宅猶傳笏元子磨厓可賣錢夜雨  
鼠鬚編素業春風麈尾話行年西湖雲鎖梅花凍休浪狂歌酌酒船

送華道士住宗陽宮

黑髮祠官佩水蒼萬松深處對虛皇黃柑有法能爲酒紫朮無飢可當糧招鶴  
舞虛山月冷檄龍吹雨海天涼瑤池欲問長生事汲澗研朱寫綠章

剪刀草

手截溪流護翠苗，陰淡蕩碧雲嬌。秋風玉殿釵留股，晴日朱筵舞折腰。眉缺可能分燕尾，頂荒猶解插雞翹。翻思往歲南方厄，羣采空陂恨未銷。

覺此一名翦刀一名

燕尾爾雅芍是也南方饑歲採食

馬伯庸擬李商隱無題次韻四首

金縷歌殘月滿江，玉顏曾憶侍油幢。象牀雲重恩專壹，鯨錦波翻賜疊雙。春淺正宜氈作幕，夜涼深恨魴爲窗。浣沙可是無靈匹，側足寒溪濺石淙。

翠簾匝匝護朱光，千葉宮桃滿院香。閨苑有鸞通尺素，靈橋無鵲寄流黃。上林賦罷歸巴蜀，輿慶詞工謫夜郎。不是月中親度曲，世人那解聽霓裳。

相期心似石城潮，日望晴虹結彩橋。卻月眉愁歌漸遠，凌波步近意非遙。抽琴有恨迴清角，疊袖無塵轉綠腰。弄玉最憐隨鳳去，秋來誰與伴吹簫。

白髮詞臣兩耳垂，華諛堆笏陋牛醫。宮娥引燭催麻日，院吏傳更寫制時。蠟燃化生秋夕賜，翠標疊勝歲華移。低頭欲說唐朝舊，願侍虛皇進玉卮。

送浦如淵辭官南歸

厭聽朝雞擁被吟吳船水滑碧千尋平洲種橘清霜重小墅栽花綠霧深瞿鵠  
真能談孟浪鴟夷端自愛浮湛因君搖蕩還家思燭影秋房恨不禁

送李公敏薊州之官

幼着儒官佩楚蘭文章元不給飢寒風前野馬停盃卻天際冥鴻拄笏看作計  
政須千樹栗養生那用九還丹徧州事簡登臨足花下題詩更倚闌

劉婦表門

王中丞妹

空林露下菊無馨玉雪深闈養暮齡河水汎舟雲耿耿湘潭鼓瑟雨冥冥夜燈  
孤雁鳴何切古鏡離鸞舞已停晚歲不須多感慨雙楹高亞柳枝青

永新□氏義門

銀髮棱棱鶴骨尊舊傳庭誥付諸孫要同公藝書芸館還擬自倫標楔門春酒  
緩歌常棣雅夜燈深候鶴鵠原他年欲向廬陵客詢是瀧岡第幾村

送柳唐佐出守懷孟

甬道塵深曉倦趨河山環抱暫分符花開屬縣詩頻賦竹暗名園酒易酤積雪



翠峯通小有祥雲朱邸接虛無寇恂可是專河內入覲應須馬疾驅

次韻大亨待制賦院中御馬纓花

華林清切謝塵纒坐閱朱英不下堂九就當胸猩血淺六騶飛翮雁行長擎天力重朝承露向日心專夜斂香清蔭政須容小草肯同羣卉鬪妍芳

賦文子方簣管亭竹影五首

簣管亭裏畫天然穠淡疎明筆有玄水底青蘋羞宛轉月中丹桂妬嬋娟錯刀側布難爲贈鉤鎖橫陳不受填午夜碧窗人獨坐分明清派出丹淵

文與可號丹淵集

瑣窗午色墨花鏤側側低低隔面濃日暝黃離金瑣碎雲開白賁玉瓏鬆蕭疎忽印青禽獨旖旎疑分翠羽重二子定知忘食色高齋今喜見遺蹤

霧縠禪衣網翠裳倚風蕭瑟轉琳琅縱橫直欲攻堅白濃淡渾疑榻硬黃劍氣

低昂動天地神光離合幻陰陽陶生久矣知形累歲晚沈冥託贈章

形贈影

玄覽功深萬化遺一窗光透白差差梳風櫛雨呈千手卻月橫雲鬪十眉形蛻

已忘身有累神交應許我相知暗中摸索誰消得阮籍途窮眼未眵

朔吹南塵久避招閉門白醉獨逍遙玉淵龍起鬚騰擲銀箔蠶登繭動搖露井

珠輝湘女淚雲屏翠暈沈郎腰象中直欲窺參伍肯學紛紛个字嬌畫竹家忘个字

栗氏玩芳亭

納納羣芳入小亭嵐光霧彩思沈冥飛花成列粘棋局高樹參前列畫屏鶴避晚烟茶半熟鶯啼午日酒初醒春風可是饒紅紫一片蒼痕眼倍青

送牟景陽信州監征二首

風帽霜鞍絳闕邊晚隨陽雁度新年榻前諫笏家猶寶架上經箱客總傳世事

不知蒼狗變機心端與白鷗眠冰天車碾淮南路痛嚼梅花一惘然

上饒山簇水精屏江左諸賢冢樹零鬼谷橋寒松化珀仙巖土暖草通靈丹鉛

有法供烹煮筍蕨無租給使令盡道中年多作惡相看鬢影各星星

送巨德新四川省郎中

金鑾清密簿曹稀拄笏看雲數雁飛蜀省地尊卿月重漢江家近使星歸草堂

舊詠迷陳迹石室殘經臥落暉戰壘已從芳草換未妨晴雨眺摩圍

退食公庭日未西  
浣溪清雨換障泥  
籌邊舊式傳銅馬  
弔古新詩問石犀  
荔子綠陰鸚鵡過  
杏花紅影秣歸啼  
遨頭雅集須頻領  
不惜鄣筒取次攜

送樂德敬甘肅儒學提舉二首

磅礴坤輿總帝圖  
手提文印化沮渠  
旋宮更問涼州譜  
尙右時通梵國書  
枸杞夜號端入驛  
蒲萄秋落易盈車  
飛沙斜日頻回首  
歸雁相迎亦憫如  
月支城下泉如酒  
祁連山前雪似沙  
虎頭萬里飛驛埃  
蜨夢五更驚塞笳  
范老籌邊心磊嵬  
李王堅壁骨槎牙  
白頭太史欲歸去  
時立東城數暮鴉

示從子瑛

聞子欲通靈寶祕  
天台洞客眼深青  
弄丸底問月消丙  
服食那能老復丁  
隔竹引龜心有想  
按圖索驥術難靈  
吾衰端有先天易  
不用山中採茯苓

送玉笥山聶道士

五月凌風龜殼船  
梁山深澗白鷗鮮  
神情清似飲金莖  
露病已何須玉井  
蓮墨閣小春刊畫  
錄碧窗新月補瓊  
篇相親每憶相忘  
處北望歸鴻倍惘  
然

人日立春子昂承旨賦詩次韻

鳳曆調元二節并泥牛華勝得相迎翦花欲擬丹心巧縷菜深憐白髮生日轉  
扶桑瀛海曙陽迴析木歲華明登高可是無芳思歸雁南來倍客情

帝京節物喜相并挾日晴暄淑景迎鳳輦雲開人共仰烏輪海轉子初生

是夜  
亥正

立春明  
日甲子岸容梅柳風光動澤腹魚龍水氣明誰惜玉堂春晝永汗青無補若爲  
情

書懷寄從子瑛二首

越公舊築鄞江宅風捲飛花劫火新子竟尋真餐白石我方作史玩青春金張  
蟻綬本欺世王謝烏衣亦可人誓墓政須堅晚歲雙峯擁髻碧嶙峋

當年羣從玉參差炙轂談天不數奇翦葉舞空山鬼泣唱籌量日曆人疑深春  
柳下爭飛騎小雨花前鬪弈棋我最少年唯閉戶篝燈煮藥學題詩

送李仲因雲南憲使

鋒車春倚少城邊上冢還家思惘然就日雲低天尺五圖南路近里三千相如

作使文如綺諸葛籌邊筆似椽自是蓬壺舊仙客望瀛新曲雁飛傳

送馮士啓淮東憲司幕長

遠涉江湖奉板輿離亭柳色易枝梧英標共擬崑山玉符采堪鄰璧社珠土竈  
煙高溼黃葦沙溝水淺漲青蒲煩君敏手須期月天際回朝認鳥鳧

送李仁父歸高安

枝藤雙屐玩青春廿載登臨筆有神東海競傳垂釣客南山曾恥上書人解凌  
水滑千帆直禁火烟消萬柳新從此閉門聞見絕高齋顏樂養天真

送王繼學御史分司汴省

松階並對影參差君竟乘驄佐聖時每恨同情不同調可堪相送復相思楚山  
春夢行雲識汴水秋聲落葉知我老江湖盍歸去少留定刷錦囊詩

院長有子在外從許州募得之院中率賦詩

袞繡門楣五色新明珠還浦竟相親月中顧兔分傳的天上麒麟抱送真仙李  
蟠根元指姓露桃食實始知春青箱萬卷能傳業佇看宅年演世綸

題東平張善父野堂

泰嶽當軒積翠環  
野堂高築稱身閒  
深春藤榭花溪醉  
小雨芒鞋藥市還  
九老尋盟歌窈窕  
諸孫勸壽舞斑斕  
客來欲說人間事  
松滿疎簾月滿關

贈姑蘇陳生

繇東昌遇大水買舟渡避水者二千得官

清秋水落渺無津  
河伯登林竈有鱗  
用力定知非一日  
論功何止活千人  
放龜晚歲川如掌  
渡蟻當年筆有神  
堪笑乘輿溱洧者  
孤舟空織竟摧輪

送鄭景尹游麗水

冰雪長身映漆瞳  
峇嶢深處珮青葱  
碧窗讀易猿啼樹  
石洞題詩鶴舞空  
強項政須消世慮  
折腰元不為身窮  
玉堂倚馬須英俊  
佇看鵬程振祖風

次韻院長新製安車

禁路縈迂雪護沙  
老來丞相許乘車  
向推紅日頭如葆  
今看青天眼未花  
馬識輪聲嘶外殿  
鶴追轍迹過仙家  
似聞相杵新堤曲  
歷錄催朝扈翠華

送張道士降香龍虎山



天香歲歲下名山雪浦春融作使還鶴引老樵渾碧眼燕迎舊主的朱顏雲浮  
玉佩身疑舉霧結層樓手可攀暇日須回侍郎宅好題修竹聽潺潺

饒州張待制之族孫

寄貫酸齋侍讀

解珮瀟湘已廣騷因風更望子胥濤身輕舊食青精飯思遠新貽金錯刀紅蓼  
秋清堪數雁黃橙霜熟且持螯龜趺林立巖題品得意那無一字褒

次韻蓬萊暢師

西山秋冷雪皚皚馬頻聽出塞歌短艇水生歸雁急故園春盡落花多登山  
見月雲光淡坐石臨溪樹影峨海上故人機事息詩來勸我老漁蓑

次韻天童岫禪師

太白峯高積翠明老禪的的寄深情相思沙磔唯懷瑾獨立鄉臺近子卿舊業  
久荒松露立浮名空眩槿朝榮定須結社修真隱寒月深燈了梵經

吳門頴上人年甚少訪余田舍且惠詩次韻

草舍苔深徑已荒何人着履試初霜飲冰喝石精神聳煮茗跑泉齒頰香愧我

歲窮驚浪走愛君年感鄙清狂古松流水平生願後會蒲團共燭光

冀寧徐母表間

月落孤幃霜滿墀篝燈深護祿中兒肯為別鵠相思操得見慈烏返哺詞槐柳  
拂雲森宅里芝蘭擁砌映門楣高堂釘坐雙眸炯時說初年涕淚頤

清容居士集卷第十

天若無熱平空山雲雨散成詩  
玉照樓無處雲  
天若無熱平空山雲雨散成詩  
玉照樓無處雲  
天若無熱平空山雲雨散成詩  
玉照樓無處雲  
天若無熱平空山雲雨散成詩  
玉照樓無處雲

清容居士集卷第十一

元 袁 桷 撰

律詩 七言

過揚州憶昔六首

令威化鶴千年返，列子御風旬日游。已信銷沈同此意，莫將寂歷起清愁。江流今古空陳迹，山色有無知幾秋。赫赫當年成底事，斜陽明滅隱滄洲。

漢東之國古隨州，一老昂藏死卽休。黑髮虎頭真骨相，青春麈尾鬪風流。人言謝傅爲朝鎮，誰信鍾儀作楚囚。浩蕩乾坤納今古，好將汗簡寫千秋。空遺蒸壤白如銀，不見當年指畫因。高視漢庭無出右，清談洛學竟成真。極知羽扇爲癡具，更恨烏衣是偶人。六合車書端有意，百年荆棘已生春。

蕭蕭凍雨濕旌旄，猶著殷紅舊戰袍。金盃昔聞歸馬埒，牙牌誰肯信龍韜。樓頭換箭鼓聲急，堂上傳盃歌韻高。到底姦雄有真態，木綿庵畔鬼車號。

連檣米艦接江湄，鞭撻東南力已疲。虛籍漸成藩鎮侈，辟書時被廟堂移。清風

號野黃蘆淨亂雨傳更畫角悲從此甲兵端不用書生有味老清時

四城賦擬張衡麗十鑑書同賈誼哀公有四城賦江東十鑑腹裏春秋納雲夢案頭今古

起風雷青衫不受折腰辱舊尉慈溪為郡守厲文翁劾去白眼豈知徒步回乙亥間道歸里舟泊城南

更回首寒風吹淚下天台此詩屬胡懷寧三省

觀物

黃河不信從天下濟水那知有伏流自古乾坤合神化空將簡牘費冥搜張華

博物身終死鄒衍談天舌竟休我亦從今銷綺語春風碧眼玩沙鷗

客中端午簡善之

海城紅憶石榴新海子空看芍藥春節物似憐游宦客風埃終媿醒吟人已無

蒲酒澆清恨那用蘭湯浣素塵健羨南坊鄧供奉團欒圍坐笑歌頻

再次韻

尚憶山城節序新榴花疑是十分春田園處處祠蠶祖浙間以端午祠蠶定絲價門戶家家

插艾人可怪詩書成白眼卻從車馬識紅塵思家那似攜家樂尊酒招邀莫厭

頻

次韻酬王參議

槐陰散髮亭亭午花影持盃拍拍春佳節擬酬懷古意清風不礙笑雲人光陰  
滿眼消黃嬾世事忘言竟綠塵相望江湖知已久相親杖屨莫嫌頻

玉堂合歡花初開鄭潛昭率同院賦詩次韻

一樹高花冠玉堂知時舒卷欲雲翔馬嘶不動游纓聳雉尾初開翠扇張舊渴  
未須餐玉屑嘉名端合記青裳雲窗霧冷文書靜留取餘清散遠香

崔豹古今注青裳一

名合歡今但名合歡而青裳之名不著

笑壓春菲綠滿堂翩翩清暑獨高翔錦雞朝日輕霞吐彩鳳舒雲密翠張中散  
舍傍銷綠綺婕妤扇底泣黃裳芭蕉可是無情思一展隨風不解香

風流一老笑烘堂解佩看花欲共翔夜露未晞歸翼斂朝陽初旭怒髯張霧窗  
不用青綾被天闕誰縫綠縹裳朱槿黃葵效開斂爭妍那得有清香

次韻鄭應奉苦雨

漏天有術那能補息壤無功不願豐漠漠雲陰來委羽昏昏水氣接垂虹

吳門水蓄

尤甚車塵已逐油泥黑龍火渾疑野燒紅萬里乘除同此意相看咄咄且書空

觀閒齋紅梅次蘇公姿字韻四首

莫恨飛瓊花信遲相看冰雪已芳時  
夔珠霞補春風面萼綠雲開旭日姿骨相

未須嫌火色精神真欲傲冰肌何人灑灑紅綾裏巧暈輕煤畫折枝

臘底飛翼瑞已遲天將絳雪報清時  
施朱可是良工手補袞端歸大雅姿溜溜

溫泉傳賜浴斑斑辱并愧淪肌閉門已覺寒如許迴首江南竹外枝

雲閣香温睡覺遲不堪殘角曉鐘時  
玉妃瓊屑難爲從青女鉛華敢弄姿可怪

蛟綃能幻色誰將猩血解填肌團團似就迴文錦薄暮凝愁下翠枝

筆底冰清落句遲花神已報豔陽時  
疎明不作顛狂夢嫵媚猶存諫諍姿酒力

衝寒端著臉枕痕破曉欲侵肌  
道人不愛人間色乞取初開第一枝

壽善之

二月柳青春滿枝十分蕉葉不須辭  
黑頭政謝赤松子碧眼故憐黃口兒玉井



蟾蜍吞暗浪錦袍蛟蝶舞游絲雲窗松暝文書靜蚤晚行修野外儀

次韻仲章游長春

積翠中天下土昏坡陁深處轉金門松間不遇采芝客雲裏空憐打麥村華表  
鶴歸城已換滄洲人去柳空存高堂靈骨疑金鑲應許重游得細論  
入極端能合寸眸丹梯危盡覺身浮手持玉笛誰爲贈背負青天我獨游山影  
西來疑駐馬雲光南去似輕鷗人間底用重迴首樂極無愁果有愁

次韻仲章舟中思南湖

綠陰濃處彩毫揮忽憶春殘理棹歸約略晚花圍錦幄招邀稚筍試斑衣長年  
客影如雲度五月湖光似雪飛從此清林供笑傲莫看迴雁損天機

再次韻

到手清觴不用揮滿川帆影逐風歸花前自憶堂前竹道上重看身上衣虛牝  
鳴秋通澗急伏雌驚曉隔林飛還家絕勝從游樂只恐雲窗趣斷機

倦客慵將麈尾揮倚篷日日聽催歸澄波自映烏紗帽小雨深憐白紵衣花徑

春殘人獨立松林雲冷鶴孤飛相思此地今如許萬里重迴且息機

次韻仲章過彭城

山影涵青簇簇來周遭城角漸低回梁分曲直雙龍下水合縱橫萬馬迴鑄冶已銷游子俠登樓誰負謫仙才淒涼正字寒如許萬疊蒼雲鎖翠苔

仲章詩律大進數日道中論詩亦頗相合復次前韻以勉之

氣摩屈賈欲平揮格律論詩要有歸石髓定成千歲乳藕絲空綴五銖衣寒原草盡蒼鷹攫涼月松陰白鶴飛從此窮河天已近還家何用詫支機

仲章詩律已入唐人風調而下語猶未馴妥殆類禪人過橋斷橋之意

近世學者類有此失仲章德業遠大當不若是此殆其弄翰也次韻

落落懸河巧發揮盤渦洄洑竟東歸苦心欲寄千年簡妙語誰傳半夜衣野馬功名甘卻走雕蟲翰墨愧橫飛多言要是平生累瞪目相忘杜德機

玉色橫陳羽扇揮江湖邂逅似忘歸終憐古調難爲瑟誰信天香不染衣汀草弄妍成背怨山雞照影惜分飛鮫人雨夜珠成滴清曉知裁第幾機

平生俗客手曾揮愛子清新欲倦歸北闕正鳴蒼玉佩南湖空製芰荷衣麒麟  
瑞世非關走鷓鴣呈空不爲飛薄宦政須成吏隱莫將奔逐墮危機

舟行將次淮南行復敘別而仲章歸程可還家作端午次韻述情

曾憶登舟送客揮艱難何事獨南歸楚鄉水暖沈菰黍江國雲深潤葛衣坡笥  
綠迎馴鹿過海榴紅駐小鶯飛笑顏已極誰爲語絕倒無嫌似陸機

中秋次韻貴白

桂子香飄露濕巾廣寒疑使月爲賓流螢不受十分采過鴈真成一點塵吹徹  
梅花天外思飲殘竹葉夢中身靈河自有乘槎便擬轉神山閱爛銀

寄王參議

輞川新樹綠勻勻睡起慵軒岸葛巾穿石養魚迴小隱盈缸釀秫補長春胸藏  
醫國三年艾天與傳家一角麟蒼狗白雲今已定不應談笑卷經綸

玉堂文杏合歡枝共說仙翁賦有詩日暮團團空翡翠兩寒點點自燕脂塗鴉  
舊詔追遺事揮塵清談補雅詞千古襟期誰與共相親那得勝相思

泊支家口望瓠山僅一舍復寄

天平水闊鴈參差下有高人坐不移懸榻定知延孺子汎舟無奈似微之晴雲  
滿塢開新畫落月穿梁想令姿眼底憐才誰復近裏糧端擬話心期

次韻應德茂寒食見懷

寒食光陰君莫游亂花羞別古枝頭山家蠶浴雨穿屋海步魚腥浪蹴舟楊柳  
飛時疑是老杜鶻啼處不緣愁詩來未盡相思意刁斗寒清月過樓

次韻史猷父春游夜歸

留取餘春伴白頭落花如雪翠如流提壺不用頻沽酒垂柳偏能獨繫舟過雨  
月開雲母障隔湖燈映水晶毬還家已覺衣裳冷遙聽鐘聲是竹洲

戲贈黃仲正

好花不受丹青鑄碧眼難將白黑分萬里宛駒出龍種十年野鶴異雞羣知卿  
未盡才難數酌我毋多酒易醺午夜池塘有新夢好將色筆寫春雲

再用韻答仲正

愛子十年燈火勤，相看不惜錦機分。  
飛花映水空憐色，去鴈出雲終念羣。  
一寸春霏生遠思，五更清夢了殘醺。  
詩來陡覺秋濤衰，海嶼青飛片片雲。

泊彭城復懷黃樓

黃樓高下復誰識，白塔短長應得知。  
萬里風煙歸傑作，百年雨露起深思。  
文章自昔爲時忌，翰墨于今作世師。  
從此江湖掩篷去，碧雲斜日數游絲。

泗水

泗水青於古蔚藍，因依碧藻淨相涵。  
遊魚細數心空羨，活火新烹舌自甘。  
可怪然犀望牛渚，底煩斬虎觸蛟潭。  
清湍混混歸滄海，不惜臨流浣舊衫。

歌風臺

長安菹醢恣猖狂，頭白翻思守四方。  
不悟宮中有呂氏，卻憂身後有吳王。  
老翁後嗣真癡弱，遊子故鄉空慨慷。  
千古英雄多此意，荒臺清淺水微茫。

清明

水落渾黃風晦冥，不知節物是清明。  
道旁新塚悲歡盡，柳下長亭聚散輕。  
門靜

鞦韆歸燕逐沙寒  
冬簷過魚驚河南  
禁酒河陽飲醉醒  
相看總有情  
宜遠樓

紫翠光中擁翠鬟  
分明倒影落西山  
遊塵自逐鐘聲去  
過雨能將月色還  
萬里關河新勝概  
一天星斗舊躋攀  
絕憐想像空題詠  
後會應須共倚闌

李學士畫壁初成席上分韻得毫字

春樹纖穠隱碧桃  
秋山磊落湧銀濤  
天邊雨露歸青障  
物外煙霞入素毫  
有客支筇臨水徑  
何人解佩憶蘭皋  
滄洲景物供題品  
準擬淋漓奪錦袍

次韻危公遠道士

驪塘族孫與子為年家

筆勢翩翩千丈坡  
一天清遠佩飛霞  
金莖欲採珠宮露  
鐵箭能敲玉壁砂  
人物滄洲憐我輩  
冰霜喬木擅君家  
百年此意知誰會  
相視無言眼倍花  
閉門積雪擁平坡  
誰把餘醺散綺霞  
掛瀑解裁天外練  
熬波竟化海中砂  
機心著物那成語  
句眼論詩合到家  
從此相親勝相望  
不妨渴墨醉成花

再次韻



家世清聲起諫坡江湖邂逅忽披霞新姿正似三眠柳妙語能爲九轉砂杯寫  
黃封來禁道窗留白醉近仙家慙慙懸榻何時下準擬寒空詠雪花  
朱顏冰雪暎瑤坡清曉朝陽漱碧霞神目豈堪容玉屑聖胎端可化金砂碧桃  
有實誰爲種玄鶴無心莫問家可怪春風滿詞筆硯池頻與滌冰花

游城南次韻陳玉峯

市橋水斷綠交加簇騎隄尋處土家坐聽蟲聲行木葉臥看雲影落簷花清晨  
采露筠籠重薄暮沾春烏帽斜一徑寒英端手種好烹晴綠代煎茶

送真定任生

束髮從戎天外萍還家何事說飄零花前秉燭頭疑黑馬上看書眼倍青倚劍  
獨憐今古月吹笳時憶短長亭故人烏府頻相問一笑惟尋雙玉瓶

次韻史允叟殘菊

白鴈西風幾夕陽故園牢落是宅鄉獨憐壽客三秋晚不受玄神一夜霜曉沐  
緩垂蒼玉珮晚粧愁帶紫羅囊凝香深院誰消得時許飛瓊點額黃

次韻元復初簡危公遠

客舍光陰幾驛亭天邊白日轉重溟擬將竹葉留春住共慰杏花隨雨零鶯入  
上林貪翠萼鶴旋華頂傲青冥十年道舊元文學爲笑無心似水萍

蔡逢原編脩婦翁壽八十

堂堂經學古儒風三世相傳八十翁靈壽杖扶雲兩屐延年水飲月雙瞳閒逢  
好客猶花下倦憶前朝似夢中閭社從今誇盛集重行彩袖舞杯空

次韻陳無我題石窗故居

煙雨歸來別有春支頤曾作笑雲人還家未信三千里拂石今看第幾塵往事  
黃梁方就枕多情白髮竟沾巾故園未覺秋容淡留取孤香次第新

夜別俞生

半秋歸夢常繚繞三十六雷煙樹重

所居山名台人謂山高處爲雷

欲別祇看今夜月無眠更

聽五更鍾青帘出市橋邊路白雁連天海上峯聞道還家有新樂不妨雲榻臥

高春

次韻正旦會朝

闐闐春迴旭日鮮  
花光搖曳珮僊僊  
金蓮漏下催初刻  
玉筍班齊祝萬年  
香擁袞龍開黼坐  
風迴笙鶴舞鈞天  
朝元法曲誰傳得  
歸醉蓬萊話日邊

送山人還江南

白雁南來愛朔風  
掉頭我亦一枝筇  
澄江去浪疑奔馬  
古洞歸雲似伏龍  
釣石水移黃葉滿  
丹爐煙冷碧苔封  
從今不說人間事  
更上峇嶢第幾重

次韻田師孟詠牡丹

積翠瑤京玉作層  
笑餐承露議誰勝  
腰寬似稱黃金重  
心巧終憐刻楮能  
蜀客錦機流水浣  
茅仙丹鼎彩雲騰  
道人香色都忘卻  
月落空闌始一凭

交枝風動碧層層  
揮手芳塵謝不勝  
解帶暮雲真韻勝  
斂襟午日是驕能  
取青媿白憐雕鏤  
抱紫迴黃合變騰  
宮錦競傳新拾得  
沈香亭檻喚誰凭

紫府淵淵十二層  
濃春如酒力初勝  
苦心似怨鮫綃薄  
敏手難誇羯鼓能  
雨立無言慚委靡  
地行何術可超騰  
雲窗烏几誰消得  
時許飛瓊月下凭

次韻師孟西曹卽事兼簡子貞儀曹二首

時議定律令

盛世昭明復古初，掃除弊事獨溫舒。  
牛毛置令心徒褊，鳥跡遺文體本疎。  
齊相避堂憐獄市，鄭人鑄鼎泣刑書。  
畫簾一度薰風曲，欲寫琴心愧不如。

蕭疎門巷落花初，楊柳陰中指望舒。  
辨拙莫窮三耳妄，塵深坐見二毛疎。  
覆蕉得鹿非真夢，點筆成蠅豈誤書。  
慷慨聽君人物論，雕蟲我亦陋相如。

次韻贈峨眉侯道士築宮江陵

白苧藤冠自在身，獨看潭影認清真。  
還丹已化千年雪，玩易重尋太古春。  
楚觀江流通白帝，蜀山雲氣接青神。  
冥鴻南北疑無跡，萬里乘風問世人。

次韻陳貴白中秋見懷

玉人海上振衣來，一曲清商鐵笛裁。  
碎露晶熒疑水立，橫雲缺落似山頽。  
卯君端有鎔銀術，西帝慚無斫桂才。  
往歲相思江北路，夜闌曾上望鄉臺。

次韻鄭景尹詠梅十首

笑壓羣芳雪霽吟，點粧詞筆補春林。  
衝風曳白疑含笑，映日抽黃轉苦心。  
鐵石

橫陳羣羽避冰霜獨立二毛深阿戎故是調羹種可爲閒情淚滿襟  
醉倚孤根散髮吟他年鼎鼐出園林黃鬚雅相非凡種白面清談豈素心湖月  
歌殘銀燭冷湘雲弄罷玉龍深疎明可是無春忍角曉霜清整翠襟  
幽人爲愛水邊吟雪滿疎籬月滿林魂冷不知莊叟化神清難撓楚王心寒蜂  
戀蜜須猶綴霜蠟含漿色轉深千古湘纍詎無意廣騷從此醉靈襟

手題色筆助飛吟雲佩衝寒入寶林雅操獨高淹海角微陽初動識天心鏤冰  
嘗巧機猶淺切玉疑神用始深回首羣芳半麤俗倚風三嗅爲開襟

回首白頭悲故吟清愁萬疊起雲林東君密注非無意北客相逢訝有心絳闕  
雲低珠藥迸碧潭風定玉徽深色香要是人間世更上凌虛始散襟

萬里相逢得放吟醉揩雙目傲瓊林龍沙慘澹明妃怨漁笛淒清處士心餐玉  
似嫌玄甫冷笑雲應喜翠微深何人更作江南句翻使兒曹競挽襟

欲看南雪倚簷吟點檢春風第一林天與陽和誰借力晚持精白轉虛心冰蠶  
半蛻眉猶溼凍蠟初銷淚漸深夜半花神應有語覆觴從此斷祥襟

梳風帶雨爲渠吟揮手唐昌陋鶴林壯髮初生齊映額童顏已就靜齋心野蠶成繭輪囷富玉兔抽毫刻畫深莫遣風姨強攘袂故教月姊與聯襟

十分深酌十分吟烏帽枝筇故繞林月下無言疑背面水邊獨立似傷心珠成蠟鳳王郎巧笙徹青鸞帝子深歲晚自知誰與伴風篁搖影互交襟

參殘霜急尙孤吟恍恍神游古躡林四皓局殘惟一色三郎鼓罷了無心珠游鐵網青琅潤苔補虬枝壞衲深擬把鸞膠固青蒂未須殘雪墮衣襟

贈潘山人

夢中得前二句因續之

布襪青鞋今已矣看山舊眼碧深深空憐石馬駐荒塚不見金魚飛翠岑地鏡有書穿石乳土圭何術候天心行年七十足稱老牛臥前坡爲指尋

次韻景尹醑醪二首

光陰風雨短長亭花到春餘倍有情翠蔓倚松超直幹錦江綠酒錫嘉名蛻蛟纏影青雲聳么鳳啼芳新雨輕白面郎君休翦綵好將椽筆賦西京

不將名字博西涼留取餘春在一觴當展珠衣迎面立曲房寶曆捧心裝碧雲



一色行明月翠幄千層護夕陽揮手朱殷空爛漫敢將清思寄幽風  
可久齋二首

虛室心源百尺澄深深龜息養空清一川鷗鷺古儀表四海弟兄真性情璧玉  
誰人傳至樸鏞鍾何處問希聲芒鞋直訪苕溪上雪透梅枝鬪月明  
三十六宮春不老何人月窟重推陳亭亭倚蓋浮空碧匝匝空輪颺素塵郢客  
詞工端自苦海翁機息可相親支頤擬問庖犧易笑指靈著似有神

送長洲江都史

官曹無事日提壺一榻深明晝倚梧稻蟹水低歌拍拍蓴鱸秋冷夢蘧蘧長年  
簿領慚錐子晚歲生涯羨木奴千里布帆歸思好雁聲伊軋起菰蒲

昌上人游京師欲言禪林弊事甫入國門若使之去者昌余里人幼歲  
留吳東郡遺老及穎秀自異者多處其地以余所識聞若承天了天平  
恩穹隆林開元茂皆可依止遂各一詩以問訊虎丘永從游尤久聞其  
謝世末爲一章以悼

人說江湖少舊僧懸崖深掛一枝藤採苓欲取千年魄擊石曾烹六月冰天上  
星辰端歷歷胸中樓閣自層層相逢上說前朝事知是松源第四燈  
青鞋高掛天平壁指點雲門三兩峯禪榻已容黃葉覆詩瓢從把碧苔封曉風  
殘月千村櫓細雨疎煙隔水春我向京城疑老盡吳山清淺越山濃  
獨木山寮不出門一瓶一鉢送朝昏巖迷鳥跡千崖泣松吼龍吟萬壑奔掩息  
端如雞抱子愛閒屢見竹生孫海門月落寒潮急準擬乘槎與共論  
玉几峯頭第一枝老禪吃吃我深知曾將鐵杵敲冰骨似怪鉛刀割密脾法外  
無心猶涉解句中有眼卽成疑袈裟不展蒲團穩此是開元妙總持  
我識虎丘三十年精神霄漢鶻張拳機當危處卽燒印語到盡時難續絃路涉  
兩岐空有泣溪流一滴竟無傳雙峯古樹蒼藤冒時有子規啼徹天  
手調千歲廣寒藥擬補月輪蟾已飛眼見昔人歸逝水心憐志士惜殘暉孤花  
苦別生香樹急雪深憐壞色衣爲愛同鄉復同客絕慚同調不同歸

山人歸去意何如八尺方牀自卷舒側岸採茶敲石火隔峯翦竹溜清渠碧潭

印月菱花鏡白雁橫空貝葉書後日相尋定何處不於吳下卽康廬

次韻王繼學

蕭蕭寒雀下庭除一榻蘧蔭是我居雪後看山雙眼淨風前攬鏡二毛疎退之  
掌制慚存藁

退之四十八歲知制誥一年僅存崔羣戶部一制余年相同亦草一制

伯玉知非定止車深愧年華

增老大還家早注故山書

除夜雪

黃雲黯淡夜如何晚勢參差更駭娑著地不隨人跡亂舞空偏入麥苗多雅驚  
列炬穿珠樹馬趁初朝映玉珂歲律詎隨人事改故將嚴冷轉陽和

元日朝迴

積素棱層厚載坤天雞三唱日初暎千官山立歸文石六衛嵩呼徹禁門花帽  
舞風喧法曲椒觴承露湛皇恩新年欲奉瑤池對願借扶搖與化鯤

萬國梯航滿禁衢卉裳象譯語音殊鳳簫聲送纖腰舞雉扇行分兩翼趨花氣  
欲浮金鑿落雲光疑下錦流蘇詞臣不識金泥祕指點薇垣頌六符

偶述末章答繼學

承明三入並時流俯仰深慚此地游誰謂東南無美箭極知西北有高樓韋編舊學陰陽秘汗簡功深歲月修三史如山詩思少那能走馬過長楸  
金鑾深處是家氈玉雪青春不負賢會見鳳毛能掌制定知麟角可膠弦浮榮芻狗寧居後曲學雕蟲敢避先慚愧南州徐孺子每看塵榻屢潸然

雪後

畫角初消已弄晴曉看突兀眼偏明寒窗駐景成虛白凍樹栽春點素瓊北戶埋藏疑有跡南枝搖曳若爲情憑君欲問飛雲巧水自白雲山自橫

送李署丞歸許下

春風得意故還鄉月白霜清傍曉裝燕領定承新鳳詔馬蹄猶戀舊鸞行溪邊父老欣相過燈下兒童訝已長我亦辭家經一載青天歸雁攪離腸